

# Ri carta ri tz'iban chique ri quiniman ri Jesucristo chiquicojol ri vinak hebreos

---

## Ri Dios ja ri Ruc'ajol rucusan richin nich'o chike

**1** <sup>1</sup>Ri ojer can, ri Dios jalajoj tak tiempo y jalajoj rubanic xucusaj richin xch'o chique ri te'ej-tata'aj richin ri rutinamit, y ja ri profetas xerucusaj richin xek'alajrisan ri ruch'abel<sup>a</sup> chiquivech. <sup>2</sup>Jac'a chupan ri ruq'uisbel tak tiempo<sup>b</sup> ri rojc'o-vi, ri Dios ja ri Ruc'ajol rucusan richin nich'o chike, ri achok pa ruk'a' xuya-vi richin ntoc rajaf ronojel.<sup>c</sup> Y mismo ri Ruc'ajol xucusaj richin rubanon ronojel ri xrojo' chi xec'uje'. <sup>3</sup>Riq'uin ri Ruc'ajol nitz'intz'ot-vi ri nimalaj ruk'ij ri Tata'aj, y tzak achel-achel ri Tata'aj, quiri' mismo ri Ruc'ajol,<sup>d</sup> ri uc'uayon ronojel riq'uin ri rutzij ri c'o ruchuk'a'. Romari', tok ch'ajch'oj chic rubanon chike chuvehch ri kamac, xtz'uye-apu chicaj pa rutz'uyubal pa ru-derecha ri nimalaj Rey<sup>e</sup> ri can c'o ruk'ij. <sup>4</sup>Y achel x-an chi más c'o ruk'ij que chiquivech ri ángeles, quiri' mismo ri rubi'<sup>f</sup> ri xyo'ox, más c'o rakale'n<sup>g</sup> que chuvehch quibi' ri ángeles.

## Ri Ruc'ajol ri Dios más c'o ruk'ij que chiquivech ri ángeles

<sup>5</sup>Roma ri Dios man jun bey quire' ru'in che jun ángel:

Rat, rat Nuc'ajol.

Vacami xatinc'ut chiquivech chi ja yin ri yin yayon ac'aslen.<sup>h</sup>

Y pa ruvi' jun ángel man jun bey quire' ru'in:

Yin, yin Tata'aj pa ruvi',

Y rija' Nuc'ajol.<sup>i</sup>

Man jun bey ru'in quiri'.

---

<sup>a</sup> 1:1 Nm. 12:6. <sup>b</sup> 1:2 Gá. 4:4. <sup>c</sup> 1:2 Sal. 2:8. <sup>d</sup> 1:3 2 Co. 4:4. <sup>e</sup> 1:3 Mr. 16:19.

<sup>f</sup> 1:4 Fil. 2:9. <sup>g</sup> 1:4 Ef. 1:20-21. <sup>h</sup> 1:5 Sal. 2:7. <sup>i</sup> 1:5 2 S. 7:14.

6Y jun bey chic ri Dios quire' nu'ij tok nutak choch'ulef<sup>j</sup> ri Ruc'ajol ri más c'o ruk'ij que chiquivech conojel:

Conojel ri nu-ángeles tiquiya' ruk'ij ri Nuc'ajol.<sup>k</sup>

Quiri' ri tz'iban can.

7Jac'a pa quivi' ri ángeles, ri ruch'abel ri Dios quire' nu'ij:

Ri ru-ángeles erusamajela' y nu'on chique achel cak'ik',

Y achel ruxak-k'ak'.<sup>l</sup>

8Pero che ri Ruc'ajol, quire' nu'ij:

Jumul-jumul xta'an gobernar, rat Dios,

Y ri ruc'u'x ri a-gobierno ja chi pa ruchojmil na'an gobernar.

9Nika chavech ri choj, y itzel natz'et ri man choj ta.

Romari' ri Dios, ri a-Dios rat, (xuk'ej, xuk'ij) aceite<sup>m</sup> pan avi'.<sup>n</sup>

Xu'on chave chi más xaquicot que chiquivech ri más chic (avachbil, avach'il).<sup>o</sup>

10Y jun chic ri xu'ij che ri Ruc'ajol, jare':

Rat Ajaf, pa na'ey xa'an ri roch'ulef,

Y riq'uin ak'a' xa'an-vi ronojel ri c'o chicaj.

11Pero c'o na jun k'ij xqueq'uis, jac'a rat jumul ratc'o.

Ri caj y ri roch'ulef xa yerijix,<sup>p</sup> achel nitziakir jun tziek.

12Xque'abus-e<sup>q</sup> y xquejal-e achel ni'an che jun tziek.

Jac'a rat, ja' achi-avech richin jumul,

Man jun bey xcarijix.<sup>r</sup>

Quiri' xu'ij ri Dios.

13Y ri Dios man jun bey quire' ru'in che jun ángel:

Catz'uye-pe pa nu-derecha,

C'a ja tok xquenia' chuxe' avakan ri itzel yatquitz'et.<sup>s</sup>

Man jun bey ru'in quiri' che jun ángel.

14Roma ri ángeles e-espíritu, y erusamajela<sup>t</sup> ri Dios ri yetak richin yequito' ri xquecolotaj.

### Nimalaj ri favor ri x-an chike chi xojcolotaj

**2** <sup>1</sup>Y roma ronojel re xka'ij yan ka, nic'atzin chi más nikaya' kaxiquin riq'uin ri ch'abel kac'axan, richin quiri' man xa c'ate nikana', juc'an chic nkuje'el-vi<sup>u</sup> riq'uin ri kac'aslen. <sup>2</sup>Roma ri ley ri xuquiya-ka ri ángeles<sup>v</sup> choch'ulef can xtzakon na vi ri nu'ij, y xa achique na k'ajon tzij y man niman ta tzij x-an chuvech ri ley ri', can xuc'ul na vi rajil<sup>w</sup>

<sup>j</sup> 1:6 He. 10:5. <sup>k</sup> 1:6 Dt. 32:43. <sup>l</sup> 1:7 Sal. 104:4. <sup>m</sup> 1:9 Ri ojer can tiempo (xk'ej, xk'ij) aceite pa ruvi' ri cha'on roma ri Dios richin ntoc rey. <sup>n</sup> 1:9 Is. 61:1.

<sup>o</sup> 1:9 Sal. 45:6, 7. <sup>p</sup> 1:11 Is. 51:6. <sup>q</sup> 1:12 Is. 34:4. <sup>r</sup> 1:12 Sal. 102:25-27.

<sup>s</sup> 1:13 Sal. 110:1. <sup>t</sup> 1:14 Sal. 103:20, 21; Lc. 1:19, 26; 2:9, 13; Hch. 12:7. <sup>u</sup> 2:1 Pr. 3:21.

<sup>v</sup> 2:2 Hch. 7:53. <sup>w</sup> 2:2 He. 10:28.

ri achel utz chi nuc'ul. <sup>3</sup>Y romari', çachel c'a xtikacol-ki' chuvech rajil, si nkumestaj pa ruvi' ri nimalaj favor ri x-an chike chi xojcolotaj?<sup>x</sup> Ri favor re' ja ri Ajaf Jesús na'ey xyo'on rutzijol, y ri xe'ac'axan ruchojmil riq'uin rija', xquik'asaj rutzijol chike.<sup>y</sup> <sup>4</sup>Y ri Dios xuc'ut chi can kitzij vi ri xquitzijoj. Roma xuc'ut nimalaj retal ri ruchuk'a', xu'on chi xebanataj ri man jun bey etz'eton, xu'on jalajoj tak milagros, y xu'on chi roma ri Lok'olaj Espíritu, xjachalo'x uchuk'a' chique ri quiniman rija' richin xequibanala' jalajoj ruvech samaj,<sup>z</sup> achel xrojo' rija'.

### Ri Jesucristo xujak bey chiquivech ri yecolotaj

<sup>5</sup>Quiri' nin-ij chive, roma ri Dios man chuxe' ta quitzij ángeles xuya-vi ri jun chic roch'ulef ri petenak más chikavech-apu,<sup>a</sup> ri nkutajin chubixic chive, <sup>6</sup>pero chupan ruch'abel ri Dios, c'o jun quire' rutz'iban can:

Ri vinak man jun ruk'ij chi rat nac'uxlaj-pe,

Nis-ta man jun rakale'n chi quiri' nuka chi'ac'u'x.<sup>b</sup>

<sup>7</sup>Pero xa'an che chi juba' ma nril quik'ij ri ángeles,

Chi can c'o rakale'n y c'o ruk'ij.

Xacusaj can ajaf pa ruvi' ronojel ri abanon riq'uin ri ak'a',

<sup>8</sup>Abanon che chi c'o ruk'a' che ronojel.<sup>c</sup>

Quiri' nu'ij chupan ri tz'iban can.

Tok ri tz'iban can re' nu'ij chi ri Dios rucusan can ri vinak chi ajaf pa ruvi' ronojel, nu'ij tzij chi ri vinak, man jun achique ri man ta c'o ruk'a'<sup>d</sup> che. Pero man jani tikatz'et chi ronojel c'o ruk'a' che. <sup>9</sup>Pero nikatz'et ri Jun ri x-an che chi más juba' oc ruk'ij que chiquivech ri ángeles, y ri' ja ri Jesús ri x-an che vacami chi c'o rakale'n y nimalaj ruk'ij,<sup>e</sup> roma xuk'asaj k'axomal ri xc'amo-e pa camic.<sup>f</sup> Y roma ru-favor ri Dios tok xk'ax pa camic koma konojel.

<sup>10</sup>Roma ri Dios ri achok richin ronojel ri c'o y achok roma banon ronojel,<sup>g</sup> rija' xu'on ri achel utz chi nibanataj. Roma rija' richin yeruq'uen-pe eq'uiy ralc'ua'l chupan ri nimalaj ruk'ij, xu'on chi chupan k'axomal<sup>h</sup> xtz'akat-vi ruc'aslen ri jakoy quibey ri yecolotaj. <sup>11</sup>Roma ri nich'ajch'ojrisan y ri ni'an ch'ajch'oj chique,<sup>i</sup> xaxe riq'uin Jun epetenak-vi. Romari' ri Jesús man niq'uix ta nu'ij ruchak'<sup>j</sup> chique. <sup>12</sup>Roma ri Jesucristo quire' ru'in:

Ajaf Dios, yin xtinya' atzijol rat chique ri junan roj avalc'ua'l quiq'uin.

Xtinbixaj ri abi' junan quiq'uin ri niquimol-qui' richin niquiya' ak'ij.<sup>k</sup>

<sup>x</sup> 2:3 Is. 45:17. <sup>y</sup> 2:3 Mr. 16:20. <sup>z</sup> 2:4 1 Co. 12:4, 11; Ef. 4:7-8, 11. <sup>a</sup> 2:5 He. 6:5.

<sup>b</sup> 2:6 Job 7:17, 18; 15:14. <sup>c</sup> 2:8 Sal. 8:4-6. <sup>d</sup> 2:8 1 Co. 15:25, 27; Ef. 1:22. <sup>e</sup> 2:9 Fil. 2:9.

<sup>f</sup> 2:9 2 Co. 5:15; 1 Ti. 2:6. <sup>g</sup> 2:10 Pr. 16:4; Is. 43:21. <sup>h</sup> 2:10 Is. 53:7-12; Lc. 24:46.

<sup>i</sup> 2:11 Ro. 8:29-30. <sup>j</sup> 2:11 Mt. 28:10; Jn. 20:17. <sup>k</sup> 2:12 Sal. 22:22.

13 Y juc'an chic che ruch'abel ri Dios, quire! xu'ij:

Yin can xticuke' nucl'u'x riq'uin ri Dios.<sup>1</sup>

Y ja chic jun re' ri xu'ij:

Vave' yinc'o-vi, junan quiq'uin ralc'ua'l ri Dios ri eruyo'on pa nuk'a'.<sup>m</sup>

Quiri' xu'ij ri Jesucristo.

<sup>14</sup>Romari' achel ri eralc'ua'l ri Dios c'o qui-cuerpo y quiquiq'uel, ja jun ri Jesucristo xc'uje' ru-cuerpo y ruquiq'uel,<sup>n</sup> richin quiri' riq'uin ri rucamic ri ru-cuerpo, xuq'uis ruchuk'a' ri rajaval ri camic,<sup>o</sup> y ri' ja ri itzel.<sup>p</sup> <sup>15</sup>Quiri' xu'on richin xeruir conojel ri chi ronojel quic'aslen eximil pa ruk'a' ri (ximhiri'il, ximhiri'y)<sup>q</sup> roma niquixi'ij-qui' chuveh ri camic.<sup>r</sup> <sup>16</sup>Roma can k'alaj chi man xpe ta chiquito'ic ángeles, xa chiquito'ic riy-rumam can ri Abraham. <sup>17</sup>Romari' xc'atzin chi rija' achel-achel ri ch'aka' chic ralc'ua'l ri Dios ri e'ocunak ruchak', richin quiri' xtiquer xoc Nimalaj Sacerdote<sup>s</sup> ri nipokonan y nu'on-apu ronojel ri nic'atzin richin chi ri Dios nu'on perdonar quimac ri tinamit. <sup>18</sup>Y roma rija' mismo xuna' k'axomal tok ri itzel xutij ruk'ij richin can ta xrojo' xutakchi'ij pa mac,<sup>t</sup> romari' c'o ruchuk'a' richin yeruto' ri yetakchi'ix chi can ta niqui'en mac.

### Ri Jesús más c'o ruk'ij que chuveh ri Moisés

**3** <sup>1</sup>Vacami c'a, rix ri junan kaniman ri Jesucristo iviq'uin, y rix richin chic ri lok'olaj rutinamit ri Dios, y rix oyon richin yixec'uje' chicaj, nin-ij c'a chive: Roma ronojel re nutz'iban-e chive, romari' tiya' utz-utz pa cuenta ri Cristo Jesús, ri rutakon<sup>u</sup> ri Dios chikacojol y Nimalaj Sacerdote pa ruvi' ri ch'abel ri kaniman<sup>v</sup> y nikatzijoj.<sup>w</sup> <sup>2</sup>Ri Cristo Jesús niniman chuveh ri xyo'on richin chupan ri samaj re', achel xniman ri Moisés<sup>x</sup> tok xc'uje' pa quivi' ri aj pa racho ri Dios. <sup>3</sup>Y achel jun tata'aj jari' ri más c'o ruk'ij chiquivech ri ec'o riq'uin pa jay, quiri' mismo ri Jesús can nuc'ul-vi chi más c'o ruk'ij que chuveh ri Moisés. <sup>4</sup>Roma ronojel familia c'o tz'ucuyun-pe richin, pero ri tz'ucuyun can ronojel, ja ri Dios.<sup>y</sup> <sup>5</sup>Can kitzij vi chi ri Moisés xniman tok xc'uje' pa quivi' ri aj pa racho ri Dios, pero xa choj samajinel, y ri xbix che chi tubana' y tu'ij, xc'atzin yan chi retal ri xteleses rutzijol tok xtik'ax más ri tiempo. <sup>6</sup>Quiri' mismo ri Jesucristo niniman pa quivi' ri aj pa racho ri Dios, pero man samajinel ta, can Ruc'ajol vi ri Dios. Y roj, roj aj pa racho, si c'a pa ruq'uisbel<sup>z</sup> man nikaya' ta can chi cukul kac'u'x, y can nikana' chi c'o rakale'n chi koyo'en-apu ri k'ij chi nikil ri favor ri sujun chike.

<sup>1</sup> 2:13 Sal. 18:2; Is. 12:2. <sup>m</sup> 2:13 Jn. 10:29; 17:6. <sup>n</sup> 2:14 Ro. 8:3. <sup>o</sup> 2:14 2 Ti. 1:10.

<sup>p</sup> 2:14 1 Jn. 3:8. <sup>q</sup> 2:15 Lc. 1:74. <sup>r</sup> 2:15 Sal. 33:19. <sup>s</sup> 2:17 He. 7:24, 25. <sup>t</sup> 2:18 He. 4:15, 16.

<sup>u</sup> 3:1 Mt. 15:24; Jn. 3:34; 5:36-38. <sup>v</sup> 3:1 2 Co. 9:13. <sup>w</sup> 3:1 1 Ti. 6:12. <sup>x</sup> 3:2 Nm. 12:7;

1 S. 12:6. <sup>y</sup> 3:4 Ef. 2:10. <sup>z</sup> 3:6 Mt. 10:22.

**Ri uxlanan richin rutinamit ri Dios**

7 Romari' ri Lok'olaj Espíritu<sup>a</sup> quire' ru'in can chupan ri ruch'abel ri Dios:

Si vacami niya' ixiquin che ri nu'ij ri Dios chive,

8 Man ticovirisaj ri ivánima,<sup>b</sup>

Achel xqui'en rutinamit ri Dios ri pa chakijlaj tz'iran ulef chupan ri k'ij tok xquiyec royoval riq'uin xcajo' xquitz'et si kitzij chi nuya' castigo pa quivi'.

9 Chiri' ri Dios quire' xu'ij: Rije' masque riq'uin quivech xquitz'et ri milagros ri xen-en cuarenta juna',

Pero xquinak voyoval riq'uin xcajo' xquitz'et si kitzij chi ninya-pe castigo pa quivi'.

10 Y xa roma ri quiri' xqui'en, xpe voyoval chique ri te'ej-tata'aj richin ri rutinamit.

Y romari' xin-ij: Jumul niqixutuj-e ri cánima viq'uin;

Ri utzulaj bey nuc'utun chiquivech, niqui'en chi achel man ta queteman.

11 Romari', ja tok catajnak voyoval chiri', xin-en jurar y xin-ij:

Man jun bey xtinya' lugar chique chi ye'oc pan uxlanan viq'uin.<sup>c</sup>

Quiri' xu'ij ri Dios.

12 Roma c'a ri', rix ri junan kaniman ri Jesucristo iviq'uin, tibana' cuenta ivi', man ta c'o jun chive ri xa itzel ránima y man cukul ta ruc'u'x y romari' nuxutuj-e-ri' riq'uin ri c'aslic Dios. 13 Ri más nic'atzin chi ni'en chivech, ja chi k'ij-k'ij tipaxa'aj-ivi',<sup>d</sup> utz c'a rojc'o na chupan tak ri k'ij richin ri vacami. Quiri' tibana', richin quiri' nis-ta jun chive nicovir ránima pa ruk'a' ri mac ri nisatzo ivichin. 14 Roma can kitzij vi, chi jun chic banon chike riq'uin ri Ruc'ajol, si roj c'a quiri' na cukul kac'u'x c'a pa ruq'uisbel<sup>e</sup> achel xka'an pa na'ey. 15 Man tikamestaj ri tz'iban chupan ruch'abel ri Dios ri nu'ij:

Si vacami niya' ixiquin che ri nu'ij ri Dios chive,

Man ticovirisaj ri ivánima achel xqui'en ri rutinamit tok xquiyec royoval.

Quiri' nu'ij ri tz'iban can.

16 Y, ¿achique c'a ri xeyaco royoval ri Dios,<sup>f</sup> masque quic'axan chic ri achique xu'ij chique? Ja conojel ri xe'eleses-pe roma ri Moisés

pa roch'ulef Egipto. 17 Y, ¿achok quiq'uin xkukut-vi ránima ri Dios cuarenta juna'? Ja quiq'uin ri xeq'uis can pa chakijlaj tz'iran ulef<sup>g</sup> roma

<sup>a</sup> 3:7 2 S. 23:2; Mt. 22:43; Mr. 12:36; Hch. 1:16; 28:25.    <sup>b</sup> 3:8 Sal. 95:7-9.

<sup>c</sup> 3:11 Sal. 95:10, 11.    <sup>d</sup> 3:13 He. 10:24, 25.    <sup>e</sup> 3:14 He. 3:6.

<sup>f</sup> 3:16 Nm. 14:2, 4, 11, 23, 30; Dt. 1:34, 35.    <sup>g</sup> 3:17 Nm. 26:65.

xequibanala' mac. <sup>18</sup>Y, ¿achok chique xu'on-vi jurar ri Dios chi can man xtuya' ta lugar chique chi ye'oc riq'uin pan uxlanen? Ja chique conojel ri man xcajo' ta xeniman tzij. <sup>19</sup>Riq'uin ri', nikatz'et chi roma man cucul ta quic'u'x riq'uin ri Dios tok man xetiquer ta xe'oc chupan ri uxlanen.<sup>h</sup>

**4** <sup>1</sup>Roma c'a ri', tikaxi'ij-ki', utz ri c'a quiri' na nisuj chike chi c'o che'el nkujoc chupan ri uxlanen ri nusuj ri Dios. Man xa tibanataj chi c'o jun chive ri xa man ntoc ta chupan ri uxlanen ri'.<sup>i</sup> <sup>2</sup>Quiri' nin-ij chive, roma achel xtzijos chike roj ri utzulaj ch'abel ri nu'ij achique ruchojmil nikil ri uxlanen, quiri' mismo ri ojer, xtzijos ruchojmil ri uxlanen chique. Pero man jun utz xuq'uen-pe chique chi xquic'axaj ri ch'abel, roma man xcuke' ta quic'u'x' riq'uin ri xquic'axaj. <sup>3</sup>Jac'a roj ri cucul kac'u'x riq'uin ri rutzijol, can nkujoc-vi chupan ri uxlanen ri nusuj ri Dios, achel xuc'uxlaj rija' tok quire' xu'ij:

Ja tok catajnak voyoval chiri', xin-en jurar y xin-ij:

Man jun bey xtinya' lugar chique chi xque'oc pan uxlanen viq'uin.<sup>k</sup> Quiri' xu'ij ri Dios, masque rija' xe tok xuq'uis can rubanic ri roch'ulef, ruchojmirisan can ronojel. <sup>4</sup>Roma chupan ri tz'iban can, quire' nu'ij pa ruvi' ri séptimo k'ij: Ri Dios tok xuq'uis can rubanic ronojel ri xrojo' chi xtz'ucutaj can, xuxlan che ri samaj ri' chupan ri séptimo k'ij.<sup>l</sup> <sup>5</sup>Y achel ri xin-ij yan ka, ri Dios quire' xu'ij chiquij ri man xeniman ta: Man jun bey xtinya' lugar chique chi xque'oc pan uxlanen viq'uin, xcha'. <sup>6</sup>Y roma k'alaj chi c'a c'o na che'el ye'oc chic ch'aka' chupan ri uxlanen ri sujun, y roma xa man xe'oc ta ri israelitas ri achok chique xyo'ox-vi na'ey ri utzulaj rutzijol ri uxlanen ri' roma man xeniman ta;<sup>m</sup> <sup>7</sup>romari' tok xk'ax q'uiy tiempo, ri Dios xusuj chic jun bey ri uxlanen. Roma ri Dios xuya' pa ránima ri David chi xu'ij ri ch'abel ri xin-ij yan ka ri quire' nu'ij:

Si vacami niya' ixiquin che ri nu'ij ri Dios chive,

Man ticovirisaj ri ivánima.<sup>n</sup>

Quiri' xuya' ri Dios pa ránima ri David.

<sup>8</sup>Roma xa ta ri Josué<sup>o</sup> xuya' ri kitzij uxlanen chique rutinamit ri Dios pa roch'ulef Canaán, ri Dios man ta chic xucha' jun k'ij pa ru-tiempo ri David richin xusuj chic jun bey ri uxlanen. <sup>9</sup>Y romari', roj ri roj rutinamit ri Dios, c'a c'o na jun uxlanen kichin, achel xuxlan rija' chupan ri séptimo k'ij. <sup>10</sup>Roma ri ocunak chic pan uxlanen riq'uin ri Dios, ja jun rija' uxlanak chuech samaj, achel xuxlan ri Dios chuech ri rusamaj.

<sup>11</sup>Roma c'a ri', tikatija' kak'ij chi nkujoc pan uxlanen riq'uin ri Dios, richin quiri' nis-ta jun txuxutuj-e-ri' riq'uin xa roma man niniman ta,<sup>p</sup> achel xquixutuj-e-qui' ri kati't-kamama' ojer can. <sup>12</sup>Roma ri ch'abel ri nu'ij ri Dios, can q'ues, y c'o ruchuk'a'<sup>q</sup> richin nu'on samaj, y más c'o rey

<sup>h</sup> 3:19 He. 4:5, 6, 11. <sup>i</sup> 4:1 He. 12:15. <sup>j</sup> 4:2 He. 3:18. <sup>k</sup> 4:3 He. 3:18. <sup>l</sup> 4:4 Gn. 2:2; Ex. 20:11. <sup>m</sup> 4:6 He. 3:19. <sup>n</sup> 4:7 Sal. 95:7, 8. <sup>o</sup> 4:8 Hch. 7:45. <sup>p</sup> 4:11 He. 3:12, 18, 19. <sup>q</sup> 4:12 Jer. 23:29.

que chuech jun ch'ich'<sup>r</sup> ri ca'i' c'o-vi rey. Roma ri ch'abel ri' nitiquer nujak ri ivánima<sup>s</sup> y ri i-espíritu, y ri achique lugar quiyukulu'n-vi-qui' ri ibakil, y ri rupan ri ibakil, y nrelesaj-pe pa sakil<sup>t</sup> ronojel ri nik'ax pan ivánima y ronojel ri ninojij chi ni'en. <sup>13</sup>Y man jun achique ruq'uiytisan ri Dios ri man ta k'alaj chuech, xa k'alaj rij-ruvech ronojel chuech ri Jun achok chuech xteka'ij-vi ronojel ri xka'an-e pa kac'aslen.

### Ri Jesús, jari' ri Nimalaj Sacerdote

<sup>14</sup>Vacami c'a, roj ja ri Jesús ri Ruc'ajol ri Dios ri ocunak Nimalaj ka-Sacerdote<sup>u</sup> chuech ri Dios chila' chicaj. Roma c'a ri', cof kuc'uje' chupan ri utzulaj ch'abel ri kaniman y nikatzijoj. <sup>15</sup>Roma ri Nimalaj ka-Sacerdote reteman achique nikana' tok manak kuchuk'a',<sup>v</sup> y nupokonaj kavech, roma achel ri jalajoj rubeyal ri nicanox chikij richin nkuka pa mac,<sup>w</sup> quiri' mismo xucusaj ri itzel richin can ta xrojo' xutakchi'ij pa mac rija', pero rija' man jun bey xu'on jun mac.<sup>x</sup> <sup>16</sup>Roma c'a ri', cukul kac'u'x kujel-apu<sup>y</sup> riq'uin ri Dios ri tz'uyul pa nimalaj tz'uyubel ri nilitaj-vi favor, richin quiri' nikil rupokonaxic kavech riq'uin, y nikil ri kato'ic ri nic'atzin.

**5** <sup>1</sup>Xa achique na achi nicha'ox chiquicojol ri israelitas richin ntoc nimalaj sacerdote,<sup>z</sup> ri rusamaj nic'atzin richin jun favor che quic'aslen ri ruvinak, riq'uin ri chicop yecamises y ri ch'aka' chic sipanic ri yerusuj chuech ri Dios richin ni'an perdonar quimac. <sup>2</sup>Y roma ri sacerdote israelita ri', ja jun rija' manak ruchuk'a' chuech ri mac, romari' nitiquer nupokonaj<sup>a</sup> quivech ri man queteman ta si utz o man utz ta ri yetajin, y ri quisatzon can ri bey. <sup>3</sup>Y roma rija' manak ruchuk'a' chuech ri mac, nic'atzin yerucamisaj chicop chuech ri Dios roma ri rumac<sup>b</sup> y roma quimac ri ruvinak. <sup>4</sup>Y man jun israelita ruyon nuya-ka ruk'ij<sup>c</sup> chi ntoc nimalaj sacerdote, xa ja ri Dios noyon richin, achel xbanataj riq'uin ri Aarón,<sup>d</sup> ja ri Dios xoyon richin chi xoc nimalaj sacerdote.

<sup>5</sup>Quiri' mismo ri Jesucristo, man ruyon ta xuya-ka ruk'ij<sup>e</sup> richin xoc Nimalaj Sacerdote, ja ri Dios quire' x-in che:

Rat, rat Nuc'ajol,

Vacami xatinc'ut chiquivech chi ja yin, yin yayon ac'aslen.<sup>f</sup>

<sup>6</sup>Achel nu'ij juc'an chic chupan ri tz'iban can:

Ja rat ri sacerdote ri man jun bey xcajalataj-e,

Can c'o ak'ij achel ruk'ij ri sacerdote Melquisedec.<sup>g</sup>

Quiri' xu'ij ri Dios che ri Jesucristo.

<sup>r</sup> 4:12 Ap. 1:16; 2:16.    <sup>s</sup> 4:12 1 Co. 14:24, 25.    <sup>t</sup> 4:12 Ef. 5:13.    <sup>u</sup> 4:14 He. 3:1; 7:26.

<sup>v</sup> 4:15 Is. 53:3.    <sup>w</sup> 4:15 Lc. 22:28.    <sup>x</sup> 4:15 2 Co. 5:21; 1 P. 2:22.    <sup>y</sup> 4:16 He. 10:19, 22.

<sup>z</sup> 5:1 He. 8:3, 4.    <sup>a</sup> 5:2 He. 2:17; 4:15.    <sup>b</sup> 5:3 Lv. 4:3.    <sup>c</sup> 5:4 1 S. 13:9-14.    <sup>d</sup> 5:4 Ex. 28:1.

<sup>e</sup> 5:5 Jn. 8:54.    <sup>f</sup> 5:5 Sal. 2:7; Hch. 13:33.    <sup>g</sup> 5:6 Sal. 110:4.

<sup>7</sup>Chupan tak ri k'ij tok ri Jesucristo xc'uje' vave' choch'u'lef, rija' riq'uin ok'e'y y ronojel ruchuk'a' xch'o richin xu'on orar,<sup>h</sup> xuc'utuj quemelal che ri Jun ri nitiquer nito'on richin chuveh ri camic. Y can xac'axex-vi-pe, roma man jun bey xrojo' xujelech'uj-e-ri' chupan ri xrojo' ri Dios che. <sup>8</sup>Rija' masque can Ruc'ajol vi ri Dios, pero xretemaj xunimaj tzij chupan ri k'axomal' ri xuk'asaj. <sup>9</sup>Y tok xtz'akat ronojel' pa ruc'aslen, x-an che chi riq'uin rija' nalex-vi-pe ri c'aslen ri richin jumul, richin nuya' chique conojel ri yeniman rutzij. <sup>10</sup>Quiri' nin-ij chive, roma ri Dios xu'on che ri Jesucristo chi xoc Nimalaj Sacerdote, y chi c'o ruk'ij achel ruk'ij ri sacerdote Melquisedec.<sup>k</sup>

### Ri naya' can avij chuveh ri Jesucristo c'o c'ayef nuq'uen-pe chave

<sup>11</sup>Can c'a q'uiy na nikajo' nika'ij chive pa ruvi' re nkutajin chubixic, pero yin ninna' chi c'ayef nin-ij chive, roma achel xa tz'apel ixiquin, y tonotak (ijolon, ivi') richin yixac'axan. <sup>12</sup>Rix c'o chic chi k'ij tinimaj ri Jesucristo, y can ta utz chi ye'itijoj chic ch'aka' pa ruvi' ruch'abel ri Dios. Pero c'a nic'atzin chi yixtijox chic jun bey riq'uin ri más man c'ayef ta' che ruch'abel ri Dios ri xivetemaj pa na'ey; xa xi'en-ka achel ac'ola' ri c'a nic'atzin na yetz'uman y man jani yetiquer niqitzuk-qui' quiyon. <sup>13</sup>Roma xa achique na jun ri xaxe chirij ri más man c'ayef ta navetemaj che ruch'abel ri Dios nutzuk-vi ri ránima, man rutijon ta ri' richin reteman achique rucojol ri choj riq'uin ri man choj ta, xa c'a achel na nene'.<sup>m</sup> <sup>14</sup>Pero ri más c'ayef navetemaj, quichin ri eq'uiyinak chupan ruch'abel ri Dios, ri niquicusaj quino'oj richin queteman achique rucojol ri utz riq'uin ri man utz ta, roma can quitijon-vi-pe-qui' richin niquicha' xe ri utz.<sup>n</sup>

**6** <sup>1</sup>Roma c'a ri', man xa tikaq'uis-tikaq'uen ri xketemaj na'ey pa ruvi' ri Jesucristo, xa kuq'uiy richin nitz'akat ri kac'aslen, man chic tikacamuluj-pe jun bey ri achok pa ruvi' xojtijox-vi pa na'ey, achel tok xbix chike chi xc'atzin xkaya' can ri mac ri xa camic nuq'uen-pe chike,<sup>o</sup> y chi xc'atzin xkaya' kánima riq'uin ri Dios. <sup>2</sup>(Chuka', ka) xojtijox pa ruvi' jalajoj tak ch'ajoj chuveh ri Dios,<sup>p</sup> xojtijox riq'uin ri naya' ak'a' pa quivi'<sup>q</sup> ri quiniman ri Jesucristo, xketemaj chi ri anima'i' can xquec'astaj na vi, y chi ri xtu'ij ri Dios pa quivi' conojel tok runic'on chic cánima chiquijununal, manak chic che'el xtijalataj. <sup>3</sup>Y can xkuq'uiy na vi pa kac'aslen, si quiri' nrojo' ri Dios. <sup>4</sup>Roma ri xyiq'uex yan quic'aslen, y xquic'ul yan pa cánima ri favor richin chicaj, y x-an yan chique chi nic'uje' ri Lok'olaj Espíritu pa cánima, <sup>5</sup>y xquina' yan ruqui'l ri ruch'abel ri Dios, y xquina' yan ri uchuk'a' richin ri tiempo ri petenak chikavech

<sup>h</sup> 5:7 Sal. 22:1; Mt. 26:53; Jn. 17:1. <sup>i</sup> 5:8 Fil. 2:8. <sup>j</sup> 5:9 He. 2:10. <sup>k</sup> 5:10 He. 6:20.

<sup>l</sup> 5:12 Gá. 4:3; He. 6:1. <sup>m</sup> 5:13 1 Co. 14:20. <sup>n</sup> 5:14 1 Co. 2:14, 15; Ef. 4:13.

<sup>o</sup> 6:1 He. 9:14. <sup>p</sup> 6:2 Hch. 19:4, 5. <sup>q</sup> 6:2 Hch. 8:14, 17; 1 Ti. 4:14.



apu,<sup>r</sup> 6 si rije' niquiya' can quij chuvech re', man jun chic che'el xtijalataj quino'oj richin nitzolij-pe ri cánima riq'uin ri Dios. Roma riq'uin ri xquiya' can quij chuvech, junan nu'ij chi niqubajij chic jun bey ri Ruc'ajol ri Dios chuvech cruz, y niquiya' chic chi q'uix jun bey chiquivech vinak.<sup>s</sup> 7 Ninya' na pe jun ejemplo chivech: jun juyu' ri q'uiy (mul, paj) nika job pa ruvi', si ri juyu' ri' nuya-pe utzulaj tak tico'n ri can c'o utz nuq'uen-pe chique ri yesamajin ruvech, ja jun ri Dios niquicot riq'uin. 8 Pero si ri juyu' ri' xaxe q'uix y ruyon (xulu-quiej, zarza) ye'el-pe chuvech, nis-ta jun niquicot riq'uin, hasta juba' ma niyok', y pa ruq'uisbel niporox ruvech.<sup>t</sup>

9 Jac'a rix ri can rixc'o pa cánima, masque cof juba' nkuch'o chive, pero cukul kac'u'x chivij chi c'o más utz xquec'alajin pan ic'aslen,<sup>u</sup> utzulaj tak favores ri can quichin vi chi niqui'en ri xecolotaj yan. 10 Roma ri Dios man jun bey xtu'on ri man choj ta; romari' man xtumestaj ta ri samaj ri ibanon pa rubi' chiquito'ic ri rutinamit, y chi c'a ja na ri vacami quiri' ye'ito' roma can nijo' rija'. 11 Pero nikarayij chive chi'ijununal chi achel e'ito'on-pe ri rutinamit ri Dios, quiri' ta c'a xti'en c'a pa ruq'uisbel, richin quiri' cukul ic'u'x chi can xtic'ul na vi ri iyo'on-apu ivech chirij. 12 Nic'atzin chi quiri' ni'en, richin man yixoc-ka k'ora', xa can ta rix tzekle'ey rij quic'aslen ri niquic'ul-apu ri rusujun can ri Dios chique roma quiyo'on cánima riq'uin, y man nik'ax ta quic'u'x chi nicoyo'ej.<sup>v</sup>

13 Roma tok ri Dios xuya' rutzij che ri Abraham chi can nuya-vi ri ru-favor che, xu'on jurar pa rubi' rija' mismo, roma manak chic jun (bi'aj, binaj) más c'o ruk'ij que chuvech rubi' ri Dios. 14 Quire' c'a ri xu'ij ri Dios: Kitzij nin-ij chave chi man juba' ta oc favor xtin-en chave, y xtin-en chi xquec'uje' eq'uiy aviy-amam.<sup>w</sup> Quiri' xu'ij ri Dios che ri Abraham. 15 Y ri Abraham man xk'ax ta ruc'u'x xroyo'ej, romari' can xuc'ul na vi ri xsuj che. 16 Roma kitzij na vi chi ri vinak tok niqui'en jurar, pa rubi' jun ri más c'o rakale'n que chuvech quibi' rije' niqui'en-vi, roma chiquivech rije', riq'uin ri niqui'en jurar, man jun chic (xtich'ojix, xtich'oyoquix), xa chirí nitz'ape-vi ronojel. 17 Y roma quiri' ni'an, ri Dios xu'on jurar pa rubi' rija' mismo, roma jani na xrojo' chi xk'alajin chiquivech ri xquec'ulu ri rusujun, chi rija' man jun bey xtujal rutzij pa ruvi' ri xsuj.<sup>x</sup> 18 Xch'o richin c'o xsuj che ri Abraham. Y xch'o chic jun bey richin xu'on jurar chi can nuya' na vi ri xsuj. Riq'uin ri quiri' xu'on, nik'alajin chi manak che'el xquejalataj ri xu'ij, nis-ta manak che'el chi xa tz'ucun tzij ri xeru'ij. Quiri' xu'on richin nuya' nimalaj ruchuk'a' ri cánima roj ri kakanon kato'ic riq'uin richin xyuke-apu ri cánima riq'uin ri rusujun chike chi nikoyo'ej-apu. 19 Y ri koyo'en-apu man juba' xtuya' chi q'uix ri cánima, y

<sup>r</sup> 6:5 He. 2:5.    <sup>s</sup> 6:6 He. 10:29.    <sup>t</sup> 6:8 Is. 5:5, 6.    <sup>u</sup> 6:9 Fil. 1:6, 7; He. 10:34, 39.

<sup>v</sup> 6:12 He. 10:36.    <sup>w</sup> 6:14 Gn. 22:16, 17.    <sup>x</sup> 6:17 Job 23:13, 14; Is. 14:24; Jer. 33:20, 21, 25, 26; Ro. 11:29.

nu'on chi cof yukul-apu ri kánima juc'an che ri pinilaj tziek ri tz'apiyon ri Lugar Más Lok'olaj.<sup>y</sup> <sup>20</sup>Chiri' xoc-vi ri Jesús ri jakoy bey chikavech, richin xojruto' roj. Roma ja rija' ri Nimalaj Sacerdote<sup>z</sup> richin jumul, y rija' c'o ruk'ij achel ruk'ij ri sacerdote Melquisedec.<sup>a</sup>

### Ri achique chi sacerdote ri Melquisedec

**7** <sup>1</sup>Ninc'uxlaj ri Melquisedec chive roma chupan ruch'abel ri Dios nik'alajin chi rija' rey pa ruvi' ri tinamit Salem, y sacerdote richin ri nimalaj Dios<sup>b</sup> ri c'o pa ruvi' ronojel. Ri Melquisedec re' xberuc'ulu' ri Abraham y xu'on bendecir tok ri Abraham tzolijnak-pe pa guerra quiqu'in ri reyes ri xeruch'ec can. <sup>2</sup>Ronojel ri relesan-pe chique ri reyes ri xeruch'ec, ri Abraham xrelesaj diezmo riq'uin y xuya' che ri Melquisedec. Ri (bi'aj, binaj) Melquisedec ca'i' ruchojmil. Jun ja chi rija' jun chojmilaj rey, y ri jun chic, ja chi rija' rey pa ruvi' ri tinamit Salem, ri nu'ij tzij rey pa ruvi' ri kitzij uxlanan. <sup>3</sup>Ri Melquisedec man k'alaj ta si xec'uje' rute-rutata', man k'alaj ta si xec'uje' rati't-rumama'. Man k'alaj ta si xalex y man k'alaj ta si (xcom, xquen). Rija' can achel ri Ruc'ajol ri Dios, roma can sacerdote vi richin jumul.<sup>c</sup>

<sup>4</sup>Tiya' na pe pa cuenta ri ajani ruk'ij ri Melquisedec, roma hasta ri Abraham, ri quixe'el can ri israelitas, che ronojel ri xrelesaj chique ri reyes, xrelesaj diezmo riq'uin richin xuya' che ri Melquisedec.<sup>d</sup> <sup>5</sup>Kitzij na vi chi ri eriy-rumam ri Leví ri ye'oc sacerdotes chiquicojol ri israelitas, can epaxa'an chi tiquic'ulu' ri jalajoj ruvech diezmo<sup>e</sup> chiquik'a' ri quivinak ri nu'ij chupan ri ley ri xyo'ox che ri Moisés, masque ri quivinak mismo eriy-rumam can ri Abraham. <sup>6</sup>Ri Melquisedec man riy-rumam ta can ri Leví, pero xuc'ul diezmo chuk'a' ri Abraham, y xu'on bendecir ri Abraham ri achok che sujun-vi ru-favor ri Dios.<sup>f</sup> <sup>7</sup>Y konojel roj vinak keteman chi ri nibano bendecir más c'o ruk'ij que chuvech ri ni'an bendecir. <sup>8</sup>Y ri riy-rumam can ri Leví achok chique niyo'ox-vi ri diezmo che quich'acoj ri quivinak, xa e'aj-roch'ulef ri c'o ruk'a' ri camic chique. Jac'a ri Melquisedec, manak rutzijol chi caminak, nu'ij tzij chi c'a q'ues na.<sup>g</sup> <sup>9</sup>Vave' c'o che'el nika'ij chi tok ri Abraham xuya' diezmo che ri Melquisedec, achel ja jun yan ri sacerdotes ri eriy-rumam ri jun ruxiquin-rumam can ri Abraham rubinan Leví ri xeyo'on, masque ri sacerdotes ri' xe'oc c'uluy richin qui-diezmo ri quivinak. <sup>10</sup>Quiri' nika'ij, roma tok ri Melquisedec xberuc'ulu' ri Abraham, ri Leví man jani rutzijol chi nalex, y c'o che'el nika'ij chi c'a pa ru-cuerpo ri rumama' Abraham c'o-vi.

<sup>11</sup>Ri sacerdotes ri eriy-rumam can ri Leví ri achok quisamaj xbano chi xc'uje' rakale'n ri ley ri xyo'ox che ri Moisés, xa ta ri quisamaj rije' xbano

<sup>y</sup> 6:19 Lv. 16:15; He. 9:7. <sup>z</sup> 6:20 He. 3:1; 4:14. <sup>a</sup> 6:20 He. 5:6. <sup>b</sup> 7:1 Gn. 14:18.

<sup>c</sup> 7:3 Sal. 110:4. <sup>d</sup> 7:4 Gn. 14:20. <sup>e</sup> 7:5 Nm. 18:21, 26. <sup>f</sup> 7:6 Gn. 12:1-3; 13:14-17; 17:4; 22:17, 18; Hch. 3:25; Ro. 4:13; Gá. 3:16; He. 6:13; 11:17. <sup>g</sup> 7:8 He. 5:6; 6:20.

chi nitz'akat quic'aslen ri israelitas chuech ri Dios, man ta xc'atzin chi xpe chic jun sacerdote ri c'o ruk'ij achel ruk'ij ri sacerdote Melquisedec. Y ri jun ri' ocunak sacerdote, pero man riy-rumam ta can ri sacerdote Aarón. <sup>12</sup>Roma si yejal-e ri sacerdotes, nic'atzin chi ja jun ri ley nijalataj. <sup>13</sup>Y ri jun chic sacerdote ri c'a juba' tikac'uxlaj-ka, xa ejun chic vi rati't-rumama', y chique ri familia ri', man jun ocunak sacerdote israelita. <sup>14</sup>Roma k'alaj chi ri Kajaf Jesucristo chiquicojol ri riy-rumam can ri Judá xalex-vi.<sup>h</sup> Y ri ley ri xyo'ox che ri Moisés manak nu'ij chi ri eriy-rumam ri Judá ye'oc sacerdotes chiquicojol ri quivinak israelitas.

<sup>15</sup>Y vacami más k'alaj ri nkutajin chubixic riq'uin ri xpe chic jun chic ruvech sacerdote ri c'o ruk'ij achel ruk'ij ri sacerdote Melquisedec. <sup>16</sup>Ri jun chic ri' ocunak sacerdote, pero man achel ta nuc'utuj ri ley ri xyo'ox che ri Moisés, roma man riy-rumam ta can ri Leví. Rija' ocunak sacerdote roma ruchuk'a' jun c'aslen ri man jun bey niq'uis. <sup>17</sup>Roma ja rija' ri nic'uxlex chupan ruch'abel ri Dios tok nu'ij:

Ja rat ri sacerdote ri man jun bey xcajalataj-e,  
Can c'o ak'ij achel ruk'ij ri sacerdote Melquisedec.<sup>i</sup>

Quiri' ri tz'iban can.

<sup>18</sup>Roma c'a ri', man nic'atzin ta chic ninimex ri nu'ij chupan ri ojer ley, roma xa manak ruchuk'a'<sup>j</sup> y man nitiquer ta yerucol ri vinak chupan ri quimac. <sup>19</sup>Roma nis-ta jun vinak xtz'akatitaj<sup>k</sup> ruc'aslen chuech ri Dios riq'uin ri xu'on ri nu'ij chupan ri ley. Pero vacami sujun jun favor más utz richin nikaya-apu kavech chirij, ri achok roma nkujel-apu riq'uin ri Dios.

<sup>20</sup>Y man xaxe ta quiri' x-an ri c'ac'ac' ruchojmil re', xa chuvi' juramento xc'achoj-vi. <sup>21</sup>Roma ri ch'aka' chic sacerdotes ri eriy-rumam can ri Leví, man jun juramento x-an richin xe'oc sacerdotes chiquicojol ri quivinak israelitas, jac'a tok ri Jesús xoc sacerdote, can x-an-vi juramento roma ri Dios ri quire' xu'ij che:

Ri Ajaf xu'on jurar y man jun bey xtutzolij ri rutzij ri quire' nu'ij:  
Ja rat ri sacerdote ri man jun bey xcajalataj-e,  
Can c'o ak'ij achel ruk'ij ri sacerdote Melquisedec.<sup>l</sup>

Quiri' xu'ij ri Dios che ri Jesús.

<sup>22</sup>Y roma man nijalataj ta e ri Jesús, ja rija' nibano chi jumul cukul kac'u'x chirij ri jun ruvujil c'aslen más utz<sup>m</sup> ri ruchojmirisan ri Dios.

<sup>23</sup>Ri sacerdotes pa quivi' ri israelitas, xc'atzin chi eq'uiy ebanayon-pe ri samaj ri', roma xa (yecom, yequen) e, y man yetiquer ta yec'uje' jumul chi sacerdotes. <sup>24</sup>Pero ri Jesús, roma manak ruk'a' ri camic che, romari' can sacerdote vi richin jumul. <sup>25</sup>Y romari' nitiquer yerucol richin jumul

<sup>h</sup> 7:14 Gn. 49:10; Mt. 1:1, 3. <sup>i</sup> 7:17 Sal. 110:4. <sup>j</sup> 7:18 Ro. 8:3. <sup>k</sup> 7:19 Hch. 13:39; Ro. 3:20; Gá. 3:21, 24. <sup>l</sup> 7:21 Sal. 110:4. <sup>m</sup> 7:22 He. 8:6.

conojel ri yejel-apu riq'uin chucanoxic ri Dios, roma jumul c'o ruc'aslen richin nuc'utuj<sup>n</sup> ru-favor ri Dios pa quivi'.

<sup>26</sup>Roma can quiri' vi jun Nimalaj Sacerdote<sup>o</sup> nic'atzin chike. Rija' lok'olaj,<sup>p</sup> man jun itzel rubanon, man jun oc rumac,<sup>q</sup> manak che'el nikajunumaj ri c'aslen xuc'uaj riq'uin quic'aslen ri aj-mac, y vacami x-an che chi más c'o ruk'ij que chiquivech conojel ri ec'o chicaj.<sup>r</sup> <sup>27</sup>Rija' man junan ta quiq'uin ri nimalaj tak sacerdotes israelitas ri eriy-rumam can ri Leví, ri nic'atzin chi ronojel k'ij yequicamisaj chicop chuvech ri Dios na'ey roma ri quimac rije', y c'ajari' roma quimac ri quivinak.<sup>s</sup> Rija' xaxe jun bey xc'atzin chi xuya-ri' pa camic chuvech ri Dios chutojic ri mac richin jumul.<sup>t</sup> <sup>28</sup>Roma ri ley ri xyo'ox che ri Moisés, aj-mac<sup>u</sup> tak achi'a' ri yeruya' richin ye'oc nimalaj tak sacerdotes pa quivi' ri israelitas. Jac'a chirij pe ri ley, can chi juramento xoc jun chic ruvech Nimalaj Sacerdote, y ri' ja ri mismo Ruc'ajol ri Dios ri banon tz'akat<sup>v</sup> che ruc'aslen richin jumul.

### Ri Jesucristo jari' xpa'e' chuvech ri c'ac'ac' ruvujil c'aslen

**8** <sup>1</sup>Vacami c'a, ri ruc'u'x ronojel ri nkutajin chubixic chive, ja chi roj c'o jun Nimalaj ka-Sacerdote ri tzt'u'ye-apu pa rutz'u'yubal pa ru-derecha ri nimalaj rutz'u'yubal ri Dios chicaj.<sup>w</sup> <sup>2</sup>Y nu'on ri samaj ri can samaj vi richin jun sacerdote chila' chupan ri kitzij racho ri Dios, ri banon roma ri Dios y man coma ta vinak.<sup>x</sup> <sup>3</sup>Roma ri ye'oc nimalaj tak sacerdotes pa quivi' ri israelitas, eyo'on richin yequicamisaj chicop y yequisuj sipanic<sup>y</sup> chuvech ri Dios roma ri mac. Romari' ja jun ri Jesús xc'atzin chi c'o xusuj chuvech ri Dios. <sup>4</sup>Xa ta ri Jesús c'a c'o ta choch'u'lef, rija' man ta sacerdote, roma c'a ec'o na sacerdotes israelitas ri yesuju sipanic chuvech ri Dios achel nu'ij chupan ri ley ri xyo'ox che ri Moisés. <sup>5</sup>Y ri samaj ri niqui'en ri sacerdotes ri' chupan ri jay vave' choch'u'lef, xaxe yan jun ruvachibel ri nuc'ut-apu chikavech pa ruvi' ri kitzij samaj chupan racho ri Dios chicaj.<sup>z</sup> Romari', tok ri Moisés ja nunojij nupaba' ri jay ri xti'an che tziek, ri Dios xu'ij che: Tatz'eta' chi ronojel ri xta'an che ri jay, junan-junan ntel riq'uin ri achel xc'ut chavech pa ruvi' ri juyul.<sup>a</sup> Quiri' xu'ij ri Dios che ri Moisés. <sup>6</sup>Pero vacami nik'alajin chi ri samaj ri nu'on ri Jesús, más q'uiy ruk'ij chuvech ri samaj xqui'en ri sacerdotes pa quivi' ri israelitas. Quiri' mismo, ri c'ac'ac' ruvujil c'aslen ri pa'el rija' chuvech, más q'uiy ruk'ij roma más utz ri nusuj ri Dios chupan, que chuvech ri ruvujil c'aslen ri c'o na'ey. <sup>7</sup>Roma xa ta ri na'ey ruvujil

<sup>n</sup> 7:25 Ro. 8:34. <sup>o</sup> 7:26 He. 3:1. <sup>p</sup> 7:26 Ap. 15:4. <sup>q</sup> 7:26 He. 4:15. <sup>r</sup> 7:26 Ef. 1:20-22.

<sup>s</sup> 7:27 Lv. 9:7; 16:15, 16. <sup>t</sup> 7:27 Ro. 6:10. <sup>u</sup> 7:28 He. 5:1, 2. <sup>v</sup> 7:28 He. 2:10.

<sup>w</sup> 8:1 Ef. 1:20; Col. 3:1. <sup>x</sup> 8:2 He. 9:11. <sup>y</sup> 8:3 He. 5:1. <sup>z</sup> 8:5 He. 9:23. <sup>a</sup> 8:5 Ex. 25:40; 26:30; 27:8; Nm. 8:4; Hch. 7:44.

c'aslen xtiquer chi tz'akat xeruto' ri vinak chuvech ri quimac, man ta chic xc'atzin jun ruca'n ruvujil c'aslen.<sup>b</sup>

<sup>8</sup> Pero can xc'atzin-vi jun ruca'n roma ri Dios quire' xu'ij richin xch'olin pa quivi' ri rutinamit:

Tiya' na pe pa cuenta chi xque'uka k'ij,

Tok xtin-en jun c'ac'ac' ruvujil c'aslen quiqu'uin ri aj pa roch'ulef

Israel y ri aj pa roch'ulef Judá.<sup>c</sup>

<sup>9</sup> Pero man achel ta ri ruvujil c'aslen ri xin-en quiqu'uin ri cati't-quimama', Chupan ri k'ij tok achel xinyukej-pe chiquik'a' richin xenvelesaj-pe pa roch'ulef Egipto;

Roma rije' xa man xcajo' ta xqui'en ri nu'ij chupan ri ruvujil c'aslen ri xin-en quiqu'uin,

Y romari' yin xenxutuj can, xcha' ri Ajaf.

<sup>10</sup> Roma c'a ri', quire' rubanic ri ruvujil c'aslen ri xtin-en quiqu'uin ri aj pa roch'ulef Israel:

Tok xtuka ri k'ij,

Xtinya' ri nu-ley pa qui-mente,

Y xtintz'ibaj riq'uin ri cánima.

Yin xquinoc qui-Dios,

Y rije' xque'oc nutinamit.<sup>d</sup>

<sup>11</sup> Y man chic xtiqitijoj ta qui' chi quivinak qui',

Nis-ta chi quichak'-quinimal qui' quire' xtiqiu'ij chiquivech: Rat

nic'atzin chi navetemaj chi ri Ajaf, jari' ri Dios, man xquecha' ta.

Roma chupan ri k'ij ri' conojel xque'eteman chi yin Dios,

Chi ch'uti'k chi nima'k.

<sup>12</sup> Roma yin can xtinpokonaj quivech y xtin-en perdonar ri man choj ta ri yequibanala',

Y ri quimac y ri itzel quibanalo'n, man jun bey chic xtinc'uxlaj.<sup>e</sup>

Quiri' nu'ij ri Dios.

<sup>13</sup> Tok xuc'uxlaj jun c'ac'ac' ruvujil c'aslen,<sup>f</sup> nu'ij tzij chi xa tzia'k chic ri na'ey ruvujil c'aslen ri xu'on ri Dios, y roma tzia'k chic, y nitziakir benak, man chic xtilayoj ta.

**9** <sup>1</sup> Vacami nin-ij chive chi chupan ri na'ey ruvujil c'aslen ri xu'on ri Dios ojer, xu'ij chique ri rutinamit ri achique ruchojmil tiquiya' ruk'ij, y ri achique ruchojmil tiquibana' che racho choch'ulef.<sup>g</sup> <sup>2</sup> Roma ri jay ri', quire' rubanic banon: Ca'i' rubanon ri rupan. Ri na'ey pe rupan ni'ix Lok'olaj Lugar che. Chiri' c'o-vi (quic'ojle'el, qui-lugar) ri candil y jun mesa, y pa ruvi' ri mesa c'o-vi ri pan<sup>h</sup> ri yesuj chuvech ri Dios. <sup>3</sup> Jac'a ri

<sup>b</sup> 8:7 He. 7:11, 18.    <sup>c</sup> 8:8 Jer. 31:31.    <sup>d</sup> 8:10 Gn. 17:7, 8; Jer. 24:7; Ez. 37:27; Zac. 8:8;

He. 10:16.    <sup>e</sup> 8:12 Jer. 31:31-34; He. 10:17.    <sup>f</sup> 8:13 Lc. 22:20; He. 7:22.    <sup>g</sup> 9:1 Ex. 25:8.

<sup>h</sup> 9:2 Lv. 24:5, 6.

chirij apu ri pinilaj tziek ri jachayon rupan ri jay, Lugar Más Lok'olaj ni'ix che. <sup>4</sup>Chiri' c'o (ruc'ojle'el, ru-lugar) jun poro'el pon banon riq'uin oro, y jun cofre ri achok chupan yacon-vi ruvujil ri c'aslen ri xu'on ri Dios ojer. Ri cofre ri' oro ri rij y ri rupan, y chupan yaquel-vi jun lak banon riq'uin oro ri c'o juba' maná' chupan, c'o ri ruch'ami'y' ri Aarón ri xjotayin chic pe, y c'o ri tz'ajtz'ak tak abaj ri achok chuveh tz'iban-vi ri ruvujil c'aslen<sup>k</sup> ri xu'on ri Dios quiqu'uin ri rutinamit ojer. <sup>5</sup>Pa ruvi' ri cofre' ec'o ca'i' querubín banon, riq'uil ri quixic' pa ruvi' ri cofre richin retal chi ri nimalaj ruk'ij ri Dios chiri' c'o-vi, ri achique lugar ni'an-vi perdonar mac. Pero vacami man nikasol ta más rubixic ronojel re' chi jujun chi jujun.

<sup>6</sup>Xaxe nin-ij chive chi riq'uin ri quiri' rubanic banon rupan ri jay, ri sacerdotes k'ij-k'ij<sup>m</sup> ye'oc-apu chupan ri na'ey pe rupan ri jay richin nequibana' can ri samaj ri can quisamaj vi richin niquiya' ruk'ij ri Dios. <sup>7</sup>Jac'a chupan ri Lugar Más Lok'olaj, xaxe ri nimalaj sacerdote ntoc-apu jun bey pa jun juna'.<sup>n</sup> Y tok ntoc-apu, ruc'uan-apu quiquiq'uel chicop richin ni'an perdonar rumac rija' y ri mac ri man xquina' ta xqui'en ri tinamit. <sup>8</sup>Riq'uin ri quiri' ni'an, ri Lok'olaj Espíritu nuk'alajrisaj chi man jani tiyo'ox lugar chique ri vinak chi ye'oc-apu chupan ri Lugar Más Lok'olaj,<sup>o</sup> roma c'a ja na ri aj-roch'ulef racho ri Dios ri nicuses. <sup>9</sup>Y riq'uin ri quiri' rucusasic rupan racho ri Dios, c'o nu'ij chirij ri tiempo tok nintz'ibaj re' chive. Roma ri quicamisasic chicop y ri quisujic ch'aka' chic sipanic chuveh ri Dios, man nitiquer ta<sup>p</sup> nu'on che cánima ri yesuju chi niquina' chi manak chic quimac chuveh ri Dios. <sup>10</sup>Roma ronojel ri xbix chique rutinamit ri Dios chi tiquibana', xa más nich'o pa ruvi' ri utz chi niquitij, chi niquikum,<sup>q</sup> y pa ruvi' jalajoj tak ruveh ch'ajoj<sup>r</sup> richin ri cuerpo, c'a terila' na ri k'ij richin jun chic ruchojmil.

<sup>11</sup>Pero vacami xpe yan ri Jesucristo ri Nimalaj Sacerdote ri c'amayon-pe ri más utzulaj tak favor ri c'o kak'a' chique vacami, roma chupan ri racho ri Dios ri más c'o ruk'ij y más c'o rakale'n, ri man achia' ta ebanayon<sup>s</sup> y man aj-roch'ulef ta, chiri' xoc-vi rija'. <sup>12</sup>Tok xoc chupan ri Lugar Más Lok'olaj chicaj, man quiquiq'uel ta achij tak cabras, nis-ta quiquiq'uel alaji' tak váquix ruc'uan-apu; xa ruquiq'uel<sup>t</sup> rija' mismo. Xaxe jun bey xc'atzin chi xoc chila' ruc'uan-apu ruquiq'uel chikalok'ic, richin nkurelesaj jumul pa ruk'a' ri ximiyon kichin. <sup>13</sup>Roma ri quiquiq'uel ri achij tak váquix y quiquiq'uel ri achij tak cabras, y ri quichajil ri alaji' tak váquix, tok niquirex<sup>u</sup> chiquij ri man ech'ajch'oj ta chuveh ri Dios, nu'on chic ch'ajch'oj che ri qui-cuerpo. <sup>14</sup>Y si quiri', más nimalaj samaj nitiquer nu'on ri ruquiq'uel ri Jesucristo ri xbin tok xusuj-ri' achel jun

<sup>i</sup> 9:4 Ex. 16:33. <sup>j</sup> 9:4 Nm. 17:10. <sup>k</sup> 9:4 Ex. 25:16. <sup>l</sup> 9:5 Lv. 16:2. <sup>m</sup> 9:6 Nm. 28:3.

<sup>n</sup> 9:7 Ex. 30:10. <sup>o</sup> 9:8 He. 10:19, 20. <sup>p</sup> 9:9 Gá. 3:21. <sup>q</sup> 9:10 Ro. 14:17. <sup>r</sup> 9:10 Nm. 19:7.

<sup>s</sup> 9:11 He. 8:2. <sup>t</sup> 9:12 Ap. 1:5. <sup>u</sup> 9:13 Lv. 16:14; Nm. 19:2, 17, 18.

ch'ajch'oj sipanic chuveh ri Dios roma ruchuk'a' ri Lok'olaj Espíritu ri c'o ruc'aslen richin jumul. Roma ri ruquiq'uel<sup>v</sup> xt'u'on che ri ivánima chi nuna' chi ch'ajch'oj chic chuveh ri ibanalo'n ri xa camic ruc'amon-pe chive, richin quiri' ja yan chic ri nrojo' ri c'aslic Dios ri ni'en. <sup>15</sup>Ja roma ri' tok ja ri Jesucristo ri pa'el chuveh ri jun c'ac'ac' ruvujil c'aslen, richin quiri' conojel ri eroyon<sup>w</sup> ri Dios niquic'ul ri herencia ri man jun bey xtiq'uis achel ri rusujun chique. Roma riq'uin ri rucamic ri Jesucristo, ye'an perdonar ri k'ajon tak tzij ri xqui'en rutinamit ri Dios tok xec'uje' chuxe' rutzij ri na'ey ruvujil c'aslen. <sup>16</sup>Roma tok nitz'ibes jun vuj pa ruvi' jun herencia, ni'ix chupan chi c'a ja rucamic ri rajaf ri vuj niyo'on rakale'n ri nitz'ibes can, y c'a ja (nicom, niqen) rija', c'ajari' nijach ri herencia achel rutz'iban can chupan ri vuj. <sup>17</sup>Roma tok banon jun vuj quiri', c'a ja nic'uje' rakale'n riq'uin rucamic ri banayon, roma manak che'el xtibanataj ri nu'ij tok c'a q'ues na ri achok camic niyo'on rakale'n ri vuj. <sup>18</sup>Romari', ja jun ri na'ey ruvujil c'aslen ojer, xc'atzin chi xtiquer-pe rucusasic riq'uin xbin quiquiq'uel<sup>x</sup> ri chicop ri xecamises. <sup>19</sup>Roma tok ri Moisés jachon chic pe ri ley pa ruk'a' roma ri Dios, xu'ij chique rutinamit ri Dios ronojel ri nu'ij chupan ri ley chi tiquibana'. Jac'ari' xeruc'ama-pe quiquiq'uel alaji' tak váquix, quiquiq'uel achij tak cabras, y xuya' ya' riq'uin. Xeruc'ama-pe juba' rusumal oveja ri muban pa jun quiek ak'on y jun ruk'a' jun che' rubinan hisopo ri achok riq'uin xuquiraj-vi ri quic' chirij ri boton vuj ri tz'iban-vi ri ley y pa quivi' conojel ri erichin ri tinamit.<sup>y</sup> <sup>20</sup>Y quire' c'a xu'ij chique: Ja riq'uin ri quic' re' nitiquer-vi-e rucusasic ri ruvujil c'aslen rubanon ri Dios ri xuchila'ej chive chi tinimaj,<sup>z</sup> xcha'. <sup>21</sup>Ja jun ri racho ri Dios y ronojel ri nicuses chiri', ri Moisés xuquiraj quic' chirij.<sup>a</sup> <sup>22</sup>Y chupan ri ley ri xyo'ox che ri Moisés nu'ij chi juba' ma ronojel ni'an ch'ajch'oj che riq'uin quic'. Y man ta nibin ruquiq'uel<sup>b</sup> jun ri nicamises, man ta ni'an perdonar mac.

### Ja rucamic ri Jesucristo nelesan ri kamac

<sup>23</sup>Can xc'atzin-vi c'a ri' chi riq'uin quiquiq'uel chicop xech'ajch'ojix-vi ronojel ri c'o chupan ri jay ri niyo'ox-vi ruk'ij ri Dios vave' choch'ulef, y ri' jun yan retal<sup>f</sup> chikavech ronojel ri richin ri racho ri Dios chicaj ri xc'atzin chi xtiquer-pe quicusasic riq'uin ri xbin quic' más c'o rakale'n que chuveh quiquiq'uel chicop. <sup>24</sup>Roma ri Jesucristo man chupan ta ri racho ri Dios banon choch'ulef ri xaxe yan jun retal ri kitzij racho ri Dios xoc-vi richin xusuj ruquiq'uel ri xbin chuveh cruz chutojic kamac. Rija' chila' chicaj xoc-vi, richin chi vacami nuc'utuj-apu kato'ic chuveh ri Dios.<sup>d</sup> <sup>25</sup>Y man nic'atzin ta chi q'uiy (mul, paj) nusuj-ri' chi sipanic pa

<sup>v</sup> 9:14 1 Jn. 1:7.    <sup>w</sup> 9:15 He. 3:1.    <sup>x</sup> 9:18 Ex. 24:5, 6.    <sup>y</sup> 9:19 Ex. 24:7.

<sup>z</sup> 9:20 Ex. 24:8; Mt. 26:28.    <sup>a</sup> 9:21 Ex. 29:12; Lv. 8:15.    <sup>b</sup> 9:22 Lv. 17:11.    <sup>c</sup> 9:23 He. 8:5.

<sup>d</sup> 9:24 Ro. 8:34; He. 7:25; 1 Jn. 2:1.

camic roma ri mac. Jac'a ri vave' choch'ulef, ri nimalaj sacerdote israelita juna-juna<sup>e</sup> nic'atzin ntoc chupan ri Lugar Más Lok'olaj richin nusuj-apu quic' ri xa man ruquiq'uel ta rija'. <sup>26</sup>Xa ta ri Jesucristo xc'atzin chi juna-juna' nusuj ri ruquiq'uel, q'uiy ta (mul, paj) xc'atzin chi xcamises, can ta xe tok xc'uje' ri roch'ulef. Jac'a ri vacami, chupan ri ruq'uisbel che ri tiempo,<sup>f</sup> rija' xe jun bey<sup>g</sup> xpe choch'ulef richin chi riq'uin ri rucamic xrelesaj jumul ri kamac ri ocunak chikacojol riq'uin ri Dios. <sup>27</sup>Y achel bin can pa kavi' roj vinak chi xaxe jun bey (nkucom, nkuquen), y c'ajari' xtitz'etetaj ri achique chi rajil-ruq'uexel xtiyo'ox pa kavi', <sup>28</sup>quiri' mismo ri Jun ri takon-pe chucolic rutinamit ri Dios, xaxe jun bey xc'atzin chi xsuj chuvech ri Dios chi sipanic pa camic roma quimac eq'uiy.<sup>h</sup> Y xtuc'ut chic ri', pero man chutojic ta chic mac, xa richin yerucol-e ri coyo'en-apu rija'.

**10** <sup>1</sup>Ri ley ri xuya' ri Dios che ri Moisés xaxe yan jun retal ronojel ri favores ri rusujun can ri Dios ojer, y mana-ta ri kitzij favor ri xuq'uen-pe ri Jesucristo. Romari' ri quiquiq'uel chicop y ri ch'aka' chic sipanic ri yesuj chuvech ri Dios juna-juna', man jun bey nu'on ch'ajch'oj jumul chique ri yejel-apu riq'uin ri Dios. <sup>2</sup>Xa ta nu'on ch'ajch'oj jumul chique, man ta chic nequisuju' can. Roma xa ta ri yesuju ri chicop chuvech ri Dios ech'ajch'oj chic jumul, can ta kitzij nuna' cánima chi ech'ajch'oj chic chuvech ri mac ri quibanalo'n. <sup>3</sup>Pero riq'uin ri juna-juna'<sup>i</sup> yequisuj chicop chuvech ri Dios, xa c'uxle'el pa cánima chi ri mac c'a quiri' na quekan,<sup>j</sup> <sup>4</sup>roma ri quiquiq'uel ri achij tak váquix y ri achij tak cabras,<sup>k</sup> man jun bey nitiquer yerelesaj mac.

<sup>5</sup>Romari', tok ri Jesucristo ja ntoc-pe vave' choch'ulef, quire' xu'ij che ri Dios:

Rat man najo' ta chi yecamises chicop chavech y man najo' ta chi nisuj sipanic chavech,

Romari' xa'an-pe jun nu-cuerpo richin chi jari' xtinsuj chavech.

<sup>6</sup>Ri yeporox avaj y ri yecamises chicop chavech richin nrelesaj mac, man niquicot ta avánima riq'uin.

<sup>7</sup>Romari' xin-ij: Rat nu-Dios, yin ja ri yinc'o richin nin-en ri narayij rat,

Achel nu'ij ri ach'abel ri tz'iban can pa nuvi' chupan ri boton vuj.<sup>l</sup> Quiri' xu'ij ri Jesucristo.

<sup>8</sup>Y achel ri xka'ij yan ka, chi ri Jesucristo quire' xu'ij che ri Dios: Ri yecamises chicop, ri yesuj ch'aka' chic sipanic, ri yeporox avaj y ri yecamises chicop chavech richin nrelesaj mac, man nika ta chavech y nis-ta niquicot ri avánima riq'uin ronojel ri yesuj chavech achel nu'ij chupan ri ley ri xyo'ox che ri Moisés. <sup>9</sup>Jac'ari' quire' chic xu'ij ri Jesucristo: Rat

<sup>e</sup> 9:25 Lv. 16:34. <sup>f</sup> 9:26 1 Co. 10:11; Gá. 4:4; Ef. 1:10. <sup>g</sup> 9:26 He. 7:27; 10:10;

<sup>h</sup> 1 P. 3:18. <sup>i</sup> 9:28 Ro. 6:10; 1 P. 2:24. <sup>j</sup> 10:3 He. 9:7. <sup>k</sup> 10:3 Lv. 16:21. <sup>l</sup> 10:4 Mi. 6:6.

<sup>l</sup> 10:7 Sal. 40:6-8.



nu-Dios, yin ja ri yinc'o richin nin-en ri narayij. Quiri' xu'ij ri Jesucristo richin xrelesaj ri ni'an na'ey chi yecamises chicop chuveh ri Dios, y xa ja ri rucamic rija' ri xoc chi sipanic pa quiq'uexel. <sup>10</sup>Y roma c'a ri nurayij ri Dios, tok x-an ch'ajch'oj<sup>m</sup> che ri kánima roma ri Jesucristo, ri xe jun bey xc'atzin chi xusuj ri ru-cuerpo chi sipanic pa camic<sup>n</sup> chuveh ri Dios chutojic ri kamac.

<sup>11</sup>Can kitzij na vi chi ronojel sacerdote israelita, k'ij-k'ij<sup>o</sup> epa'el niqui'en ri can samaj vi richin jun sacerdote, y q'uiy (mul, paj) ja mismo ruveh sipanic niquisuj chuveh ri Dios, y ri achique niquisuj, man jun bey nitiquer nrelesaj ri mac. <sup>12</sup>Jac'a ri Jesucristo tok rusujun-ri' chi sipanic jun bey pa camic chutojic jumul ri kamac, jari' xtz'uye-apu pa rutz'uyubal pa ru-derecha<sup>p</sup> ri Dios. <sup>13</sup>Y chila' c'o-vi, royo'en ri k'ij c'a ja tok xqueyo'ox pa ruk'a<sup>q</sup> ri itzel yetz'eto richin. <sup>14</sup>Roma rija' xaxe jun bey xc'atzin chi xusuj-ri' chi sipanic pa camic chuveh ri Dios, y riq'uin ri', xu'on ch'ajch'oj jumul' che ri kánima chuveh ri Dios, roj ri nkujel-apu riq'uin richin nich'ajch'ojir más ri kac'aslen. <sup>15</sup>Y ri Lok'olaj Espíritu<sup>s</sup> nuya' rutzij chi can quiri' vi. Rija' na'ey quire' ruk'alajrisan:

<sup>16</sup>Xterila' na jun k'ij, nicha' ri Ajaf,

Tok quire' jun c'ac'ac' ruvujil c'aslen xtin-en quiq'uin ri nutinamit:

Xtinya' ri nu-ley pa cánima,

Y xtintz'ibaj pa qui-mente.<sup>t</sup>

Quiri' nu'ij ri Ajaf.

<sup>17</sup>Y pa ruvi' ri', rija' quire' chic xu'ij:

Ri quimac y ri k'ajon tak tzij quibanon, man jun bey chic

xtinc'uxlaj.<sup>u</sup>

Quiri' ru'in ri Ajaf.

<sup>18</sup>Y riq'uin ri ni'an perdonar ronojel ri kamac, man nic'atzin ta chic chi yecamises chicop roma ri mac.

<sup>19</sup>Vacami c'a, roj ri junan kaniman ri Jesucristo iviq'uin, kujel-apu riq'uin ri Dios, roma c'o chic kak'a' richin nkujoc-apu<sup>v</sup> chupan ri Lugar Más Lok'olaj ri c'o-vi ri Dios, roma xsuj chiri' ri ruqui'uel ri Jesucristo ri xbin koma. <sup>20</sup>Nu'ij tzij chi rija' riq'uin xsocotaj ri ru-cuerpo, xujak jun c'ac'ac' bey<sup>w</sup> richin c'aslen chikavech ri nuc'uan-apu kichin juc'an che ri pinilaj tziek ri tz'apiyon ri Lugar Más Lok'olaj. <sup>21</sup>Y jun chic roma nkujel-apu, ja roma c'o Jun Nimalaj Sacerdote pa kavi' roj ri roj rutinamit chic ri Dios. <sup>22</sup>Roma c'a ri', ronojel kánima kujel-apu riq'uin ri Dios, tz'akat ticuke-apu kac'u'x,<sup>x</sup> tuna' kánima chi roj ch'ajch'oj chic chuveh

<sup>m</sup> 10:10 Zac. 13:1; Jn. 17:19; He. 13:12.    <sup>n</sup> 10:10 Jn. 19:30.    <sup>o</sup> 10:11 Nm. 28:3;

He. 7:27.    <sup>p</sup> 10:12 Col. 3:1; He. 1:3.    <sup>q</sup> 10:13 Sal. 110:1; Hch. 2:35; 1 Co. 15:25; He. 1:13.

<sup>r</sup> 10:14 He. 10:1, 10.    <sup>s</sup> 10:15 2 P. 1:21.    <sup>t</sup> 10:16 Jer. 31:33.    <sup>u</sup> 10:17 Jer. 31:34.

<sup>v</sup> 10:19 Ro. 5:2; He. 4:16.    <sup>w</sup> 10:20 He. 9:8.    <sup>x</sup> 10:22 Stg. 1:6.

ri man utz ta kabanalo'n,<sup>y</sup> y can ta ch'ajon ri ka-cuerpo riq'u'in ch'ajch'oj ya'. <sup>23</sup>Man ta nku'e quila', nku'e quila' pa ruvi' ri nika'ij chi koyo'en, xa cof ticuke-apu kac'u'x riq'u'in, roma ri Dios can nuya-vi ri rusujun.<sup>z</sup> <sup>24</sup>Y tikanojij achique utz chi nika'an richin nikatola-ki' chikavech richin más niq'uiyer-pe kiq'u'in chi nkujo'on pa tak kánima y chi nika'an favor chique ch'aka' chic. <sup>25</sup>Man tikaya' can chi nikamol-ki' pa rubi' ri Dios,<sup>a</sup> achel niqui'en jujun ri can quichin vi chi niquiya' can; xa tikapaxa'aj-ki' chikavech, y más quiri' nic'atzin chi nika'an riq'u'in ri nikatz'et chi nijel-pe<sup>b</sup> ri k'ij chi nipe chic jun bey ri Ajaf.

### Yepaxa'ex ri (chubanic, por onic) yebano mac

<sup>26</sup>Quiri' nin-ij chive, roma roj ri kac'ulun chic ruchojmil ri kitziy, si (chubanic, por onic)<sup>c</sup> nikabanala' mac y nikaya' can kij jumul chuvech ri Jesucristo, man jun chic ri xtusuj-ri' pa camic pa kaq'uexel chuvech ri Dios roma ri mac.<sup>d</sup> <sup>27</sup>Ri yebano quiri', xaxe chic coyo'en jun ximbirilaj castigo, y jun k'ak' ri jani na niroko ri xtiq'uiso quik'ij ri itzel yetz'eto ri Dios. <sup>28</sup>Ri ley ri xuya' ri Dios che ri Moisés nu'ij chi xa achique na ri man nunimaj ta ri nu'ij ri ley ri', xa can xticamises na vi, si ec'o ca'i-oxi' yek'alajrisan chirij chi can kitziy na vi chi man nunimaj ta.<sup>e</sup> <sup>29</sup>Y si quiri', tinojij na pe' ajani chi castigo ri utz chi xtiyo'ox pa ruvi' ri man jun rakale'n nu'on che ri Ruc'ajol ri Dios, y man jun rakale'n nu'on che ri quic'<sup>f</sup> ri achok riq'u'in xc'achoj-vi ri c'ac'ac' ruvujil c'aslen, ri quic' ri xbin richin xch'ajch'ojir ri ruc'aslen, y nuyok' ri Lok'olaj Espíritu<sup>g</sup> ri niyo'on favor. <sup>30</sup>Roma roj keteman ruvech ri Ajaf ri quire' ru'in: Xe yin c'o nuk'a' richin nin-en ruq'uexel,<sup>h</sup> y can xtinya' na vi rajil ronojel ri achique quibanon ri vinak. Y juc'an chic nu'ij: Ri Ajaf can xtunic'oj na vi rij quic'aslen ri erutinamit.<sup>i</sup> Quiri' ri tz'iban can. <sup>31</sup>Romari', jnimalaj (ximbi'ril, ximbi'ri'y) che ri xtika ruk'a' ri c'aslic Dios pa ruvi'!

<sup>32</sup>Pero rix, man que'imestaj ri k'ij ek'axnak can tok banon chic sakil che ri ic'aslen chiri', xa xicoch' chi xik'asaj nimalaj tak k'axomal. <sup>33</sup>Ec'o chive kitziy na vi chi xixq'uixbises chiquivech vinak riq'u'in k'axomal y riq'u'in ri xbilox' tzij chive, y ec'o chive xic'ut-ivi' chi xa jun ivánima quiqu'in ri xek'asan ri k'axomal ri'. <sup>34</sup>Roma ja jun ri eyo'on pa tak cárcel xipokonaj quivech, y tok ri vinak xquimajla-e chive ri achique ichajin, xa qui' ivánima<sup>j</sup> xiya-e. Roma iveteman chi chila' chicaj<sup>k</sup> c'o jun ibeyomal más utz ri man jun ntoc che. <sup>35</sup>Roma c'a ri', man tiya' can juc'an chi cukul ic'u'x riq'u'in ri Dios, roma c'o jun nimalaj rajil-ruq'uexel xtuq'u'en-

<sup>y</sup> 10:22 Ez. 36:25; 2 Co. 7:1. <sup>z</sup> 10:23 1 Co. 1:9. <sup>a</sup> 10:25 Hch. 2:42.

<sup>b</sup> 10:25 Ro. 13:11; 2 P. 3:9. <sup>c</sup> 10:26 Nm. 15:30. <sup>d</sup> 10:26 2 P. 2:20. <sup>e</sup> 10:28 Dt. 17:2, 6.

<sup>f</sup> 10:29 1 Co. 11:29. <sup>g</sup> 10:29 Mt. 12:31. <sup>h</sup> 10:30 Dt. 32:35; Sal. 94:1. <sup>i</sup> 10:30 Dt. 32:36; Sal. 50:4. <sup>j</sup> 10:34 Hch. 5:41. <sup>k</sup> 10:34 Mt. 5:12.

pe chive. <sup>36</sup>Roma can nic'atzin na vi chi rix yixcoch'on,<sup>l</sup> richin quiri' tok ibanon chic apu ri nurayij ri Dios chive, can xtiyo'ox-vi chive ri favor ri sujun.<sup>m</sup>

<sup>37</sup>Achel nu'ij chupan ruch'abel ri Dios ri tz'iban can:

Roma xa juba' chic nrojo' chi nipe ri Jun ri can xtipe na vi. Cha'anin xtuka y man layoj ta chic xtoyo'ex.

<sup>38</sup>Y ri man jun mac rakalen chuveh ri Dios, xtril ri c'aslen ri richin jumul, roma cukul ruc'u'x chi ri nusuj ri Dios, can xtiyo'ox-vi che.<sup>n</sup>

Pero si nutzolij-ri' chirij, ri Dios man juba' xtiqicot ránima riq'uin.<sup>o</sup>

Quiri' nu'ij ri Dios.

<sup>39</sup>Jac'a roj man roje'o ta chiquicojol ri niquiya' can quij chuveh ri Dios chusatzic ri cánima c'a ja tok manak chic che'el yecolotaj. Roj ja chiquicojol ri cukul quic'u'x riq'uin ri Dios roje'o-vi, chuchajixic ri kánima c'a ja tok nkucolotaj-e.

#### Ri quic'aslen ri xcuke' quic'u'x riq'uin ri Dios

**11** <sup>1</sup>Jun ri cukul ruc'u'x can nuna' ránima chi xtuc'ul na vi ri royo'en, y masque man nutz'et ta<sup>p</sup> riq'uin ruveh ri royo'en, nunimaj chi can c'o na vi. <sup>2</sup>Quiri' nin-ij chive roma riq'uin xcuke' quic'u'x<sup>q</sup> ri ojer tak kati't-kamama', xbix chi utz xek'alajin chuveh ri Dios. <sup>3</sup>Roj roma cukul kac'u'x, keteman chi xc'uje' ri roch'u'lef y ri caj xaxe riq'uin ri xu'ij ri Dios chi quec'uje',<sup>r</sup> nu'ij tzij chi ronojel ri nitz'etetaj vacami, x-an riq'uin ri man nitz'etetaj ta.

<sup>4</sup>Ri Abel, roma cukul ruc'u'x,<sup>s</sup> más utz sipanic xusuj chuveh ri Dios que chuveh ri xusuj ri Caín, y roma cukul ruc'u'x, romari' xk'alajin chi jun chojmilaj achi, y mismo ri Dios xk'alajrisan chi xuc'ul ri sipanic ri xusuj. Y masque caminak chic ri Abel, pero achel can c'a nich'o na chike riq'uin ri xcuke' ruc'u'x riq'uin ri Dios. <sup>5</sup>Ri Enoc,<sup>t</sup> roma cukul ruc'u'x, quiri' q'ues xuc'u'ax chicaj<sup>u</sup> richin man xk'ax ta chupan ri camic. Man xtz'etetaj ta chic choch'u'lef, roma ja ri Dios xuc'uan-e richin, pero na'ey chi xuc'u'ax, xk'alajin chi ri Dios xquicot ránima riq'uin. <sup>6</sup>Pero ri man cukul ta ruc'u'x,<sup>v</sup> ri Dios man juba' xtiqicot ránima riq'uin. Roma xa achique na ri nrojo' nijel-apu riq'uin ri Dios, nic'atzin nunimaj chi kitzij c'o,<sup>w</sup> y chi rija' can nuya-vi utzulaj rajil-ruqu'uxel chique ri yecanon richin. <sup>7</sup>Ri Noé, roma cukul ruc'u'x, xunimaj ri xu'ij ri Dios che chi c'o ri man jun bey etz'eton pa ruvi' ri roch'u'lef ri xquebanataj.<sup>x</sup> Romari', xupaba' jun barco richin chi chupan ri' xecolotaj-vi ri aj chiracho. Rija'

<sup>l</sup> 10:36 Lc. 21:19.    <sup>m</sup> 10:36 Col. 3:24.    <sup>n</sup> 10:38 Ro. 1:17.    <sup>o</sup> 10:38 Hab. 2:3, 4.

<sup>p</sup> 11:1 2 Co. 4:18.    <sup>q</sup> 11:2 He. 11:4, 5, 39.    <sup>r</sup> 11:3 Jn. 1:3.    <sup>s</sup> 11:4 Gn. 4:4; Mt. 23:35; 1 Jn. 3:11, 12.    <sup>t</sup> 11:5 Lc. 3:37; Jud. 14.    <sup>u</sup> 11:5 Gn. 5:22, 24.    <sup>v</sup> 11:6 Nm. 14:11; 20:12; Sal. 78:22, 32; 106:21.    <sup>w</sup> 11:6 Jn. 3:18, 36.    <sup>x</sup> 11:7 Gn. 6:13.

roma cukul ruc'u'x, xu'on chi xk'alajin chi can utz vi chi xka castigo pa quivi' ri man xeniman ta ri Dios, y x-an che chi c'o ruk'a' che ri nusuj ri Dios chique ri nicuke' quic'u'x riq'uin, y ri' ja chi manak chic quimac<sup>y</sup> nicakalej chuvech.

<sup>8</sup>Ri Abraham, roma cukul ruc'u'x, xunimaj tzij tok xoyox richin xbe chupan ri lugar ri xtuc'ul chi herencia, y xbe c'a, masque nis-ta reteman achique lugar ni'e-vi.<sup>z</sup> <sup>9</sup>Roma cukul ruc'u'x, xc'uje' chupan ri lugar ri sujun che roma ri Dios achel jun vinak petenak naj ri man c'o ta pa rutinamit. Chiri' rija' xa pa carpa xuk'asaj-vi ruc'aslen,<sup>a</sup> junan riq'uin ri ralc'ua'l rubinan Isaac, y ri ralc'ua'l ri Isaac ri rubinan Jacob, y (chuka', ka) chique rije' sujun-vi ri lugar ri' roma ri Dios. <sup>10</sup>Quiri' ri c'aslen xuk'asaj ri Abraham, roma can royo'en ri aj-chicaj y covilaj rutz'uyubal<sup>b</sup> tinamit ri ja ri Dios nuc'uyun ruchojmil y banayon rubanic.<sup>c</sup> <sup>11</sup>Ja jun ri Sara<sup>d</sup> ri rixayil ri Abraham, masque man alanel ta,<sup>e</sup> pero roma cukul ruc'u'x riq'uin ri Dios, xuc'ul uchuk'a' richin xpe alanic chirij. Y can xc'uje' na vi ac'ual chuk'a' tok xa man ruk'ijul ta chic, roma rija' xunimaj chi ri Dios ri xsuju che chi nic'uje' ral, can nuya-vi ri rusujun. <sup>12</sup>Y romari' tok riq'uin ri Abraham, ri nik'alajin chi xa man yec'uje' ta chic ralc'ua'l,<sup>f</sup> xeq'uiyer-vi-pe riy-rumam ri e'achel ch'umila' richin chicaj, y e'achel (sanayi, sanayil) chuchi' mar roma man jun nitiquer najlan quichin.

<sup>13</sup>Conojel ri xcuke' quic'u'x riq'uin ri Dios ri yitajin chubixic chive, cukul-e quic'u'x (xecom, xequen), y nis-ta man xquic'ul ta e ri sujun chique roma ri Dios; xaxe xquitz'et-apu chi naj, xquinimaj-e chi can xtoc na vi quichin y niquicot cánima chi can nequila' na vi. Rije' (xquiya', xquiq'uen) chiquij chi xa man pa quitinamit ta ec'o-vi y chi xaxe juba' yek'ax-e<sup>g</sup> chuvech re roch'ulef. <sup>14</sup>Roma xa achique na ri quiri' (niquiya', niquiq'uen) chiquij, niquik'alajrisaj chi c'a ebenak na chucanoxic ri kitzij quitinamit.<sup>h</sup> <sup>15</sup>Xa ta rije' ja ri tinamit ri xe'el-vi-pe ri yetajin chunojixic, c'o ta che'el xetzolij. <sup>16</sup>Jac'a rije' xa jun tinamit más utz ri benak cánima chirij, ri chila' chicaj<sup>i</sup> c'o-vi, y romari' ri Dios man niq'uiux ta nu'ij chi qui-Dios<sup>j</sup> rije'; roma rubanon rubanic jun quitinamit.

<sup>17</sup>Ri Abraham, roma cukul ruc'u'x, xusuj ri ruc'ajol Isaac pa ruvi' jun altar, tok ri Dios<sup>k</sup> xrojo' xutz'et achique rubanon ránima ri Abraham, ri achok che rusujun-vi chi can c'o xtuc'ul. Ja Abraham ri' ri ja nucamisaj-ka ri juney ruc'ajol, <sup>18</sup>masque ri Dios quire' ru'in che: Ja chiquicojol ri riy-rumam ri jun ac'ajol rubinan Isaac xquencha-vi ri kitzij xque'oc nutinamit.<sup>l</sup> Quiri' ru'in ri Dios che. <sup>19</sup>Jac'a rija' xunojij-ka chi masque

<sup>y</sup> 11:7 Ro. 3:22; Fil. 3:9. <sup>z</sup> 11:8 Gn. 12:1, 4. <sup>a</sup> 11:9 Gn. 12:8. <sup>b</sup> 11:10 Ap. 21:2.

<sup>c</sup> 11:10 Is. 14:32; 2 Co. 5:1. <sup>d</sup> 11:11 Gn. 17:19. <sup>e</sup> 11:11 Lc. 1:36. <sup>f</sup> 11:12 Ro. 4:19.

<sup>g</sup> 11:13 Gn. 47:9. <sup>h</sup> 11:14 He. 13:14. <sup>i</sup> 11:16 Fil. 3:20. <sup>j</sup> 11:16 Ex. 3:6, 15.

<sup>k</sup> 11:17 Gn. 22:1, 2; Stg. 2:21. <sup>l</sup> 11:18 Gn. 21:12.

xtucamisaj ri ralc'ua'l pa ruvi' ri altar, ri Dios c'o ruchuk'a' chi xtuc'asoj<sup>m</sup> chic pe. Y riq'uin ri xbanataj, c'o che'el nika'ij chi ri Abraham xuq'uen chic pe ri ruc'ajol chiquicojol ri anima'l'. <sup>20</sup>Ri Isaac, roma cukul ruc'u'x, xu'ij yan can chique ri ca'i' ruc'ajol Jacob y Esaú quibi', ri achique chi favor xtequic'ulu' chiquijununal.<sup>n</sup> <sup>21</sup>Ri Jacob roma cukul ruc'u'x, ja tok juba' chic k'ij q'ues chiri', xeru'on can bendecir chiquijununal ri eruc'ajol ri José,<sup>o</sup> y xuya' ruk'ij ri Dios lucul pa ruvi' ri ruch'ami'y.<sup>p</sup> <sup>22</sup>Ri José roma cukul ruc'u'x, ja tok juba' chic k'ij q'ues chiri', xuc'uxlaj can chique ri ruvinak israelitas chi c'o na jun k'ij xque'el-e chiri' pan Egipto.<sup>q</sup> Y xu'ij can chique ri achique niqui'en riq'uin ri rubakil.<sup>r</sup>

<sup>23</sup>Ri rute-rutata' ri Moisés, roma cukul quic'u'x,<sup>s</sup> man xquixi'ij ta qui' xquevaj oxil' ic'<sup>t</sup> ri Moisés pa cacho tok xalex, masque ri rey Faraón ru'in chi quecamises<sup>u</sup> conojel ch'utik alabo. Quiri' xqui'en, roma xquitz'et chi ri ac'ual jabel oc.<sup>v</sup> <sup>24</sup>Ri Moisés tok ala' chic chiri', roma cukul ruc'u'x, ruyon xuxutuj can chi rija' ral rumi'al<sup>w</sup> ri rey Faraón. <sup>25</sup>Más xrojo' xucha'<sup>x</sup> chi junan niquik'asaj k'axomal riq'uin rutinamit ri Dios, que chuech nucha' chi niquicot juba'<sup>y</sup> ránima chupan ri c'aslen ri richin mac, <sup>26</sup>y xuya' pa ránima chi más nimalaj beyomal chi niyo'ox chi q'uix<sup>z</sup> roma rubi' ri Jun ri xtutak-pe ri Dios chucolic ri rutinamit, que chuech c'o ruk'a' che ri beyomal pan Egipto. Roma rija' ruyo'on-apu ruvech chirij ri nimalaj rajil-ruq'uexel ri xtuya' ri Dios. <sup>27</sup>Y roma cukul ruc'u'x, xuya' can ri Egipto.<sup>a</sup> Man xuxi'ij ta ri' chuech royoval ri rey Faraón, roma xa jun xu'on che ri ránima, achel can ta nutz'et-apu ri Jun ri man nitz'etetaj ta. <sup>28</sup>Ri Moisés, roma cukul ruc'u'x, xu'on ri na'ey nimak'ij pascua,<sup>b</sup> y xu'ij chique ri ruvinak israelitas chi quequicamisaj ovejas, y chi ri quiquiqu'uel ri ovejas tiquitzicaj chuchi' tak cacho, richin chi ri camisanel<sup>c</sup> quichin ri (nimala'tz, nimalaxel) tak ac'ola', man ja jun quichin ri israelitas querucamisaj.

<sup>29</sup>Ri israelitas, roma cukul quic'u'x, xek'ax chupan ri Mar Rojo, achel xa ta pa chaki'j ulef<sup>d</sup> yebin-vi. Y tok ri soldados richin ri roch'ulef Egipto xcajo' xqui'en quiri', xa xejik' conojel. <sup>30</sup>Ri israelitas, roma cukul quic'u'x chi ri Dios yeruto', romari' chupan ri séptimo k'ij<sup>e</sup> chi niquiyala' vuelta chirij ri tinamit Jericó, xetzak ri nimalaj tak muro ri tz'apiyon rij. <sup>31</sup>Ri ixok Rahab ri man utz ta ruc'aslen, riq'uin xcuke' ruc'u'x riq'uin ri Dios, man (xcom, xquen) ta junan quiquin ri ruvinak aj-Jericó ri man xquinimaj ta ri Dios, roma utz xeruc'ul chiracho ri

<sup>m</sup> 11:19 Ro. 4:17, 19, 21.    <sup>n</sup> 11:20 Gn. 27:27-29, 39, 40.    <sup>o</sup> 11:21 Gn. 48:5.

<sup>p</sup> 11:21 Gn. 47:31.    <sup>q</sup> 11:22 Gn. 50:24.    <sup>r</sup> 11:22 Ex. 13:19.    <sup>s</sup> 11:23 Sal. 56:4; 118:6; Is. 8:12, 13.    <sup>t</sup> 11:23 Ex. 2:2.    <sup>u</sup> 11:23 Ex. 1:16.    <sup>v</sup> 11:23 Hch. 7:20.

<sup>w</sup> 11:24 Ex. 2:10, 11.    <sup>x</sup> 11:25 Sal. 84:10; Mt. 5:10-12.    <sup>y</sup> 11:25 2 Co. 4:17.

<sup>z</sup> 11:26 He. 13:13.    <sup>a</sup> 11:27 Ex. 10:29; 12:37.    <sup>b</sup> 11:28 Ex. 12:21.    <sup>c</sup> 11:28 Ex. 12:29, 30.

<sup>d</sup> 11:29 Ex. 14:22-29.    <sup>e</sup> 11:30 Jos. 6:1-20.

israelitas etakon-apu richin ye'enachan<sup>f</sup> can che'elek'el chupan ri tinamit.

<sup>32</sup>Y c'a ec'o chic más ri xcuke' quic'u'x riq'u'in ri Dios, pero xa ta nintzijoj chive quic'aslen ri Gedeón,<sup>g</sup> ri Barac,<sup>h</sup> ri Sansón,<sup>i</sup> ri Jefté,<sup>j</sup> ri David,<sup>k</sup> ri Samuel<sup>l</sup> y ri eru-profetas ri Dios, xa man yiru'on ta ri tiempo. <sup>33</sup>Ch'aka' chique rije' roma cukul quic'u'x, xetiquer chiquij ch'aka' chic tinamit, ch'aka' pa ruchojmil xqui'en gobernar rutinamit ri Dios, ec'o xquil yan e ri rusujun ri Dios chique, ch'aka' xqui'en chique leones chi man xec'uxun ta, <sup>34</sup>ch'aka' xquichup ruchuk'a' nimalaj tak k'ak', ch'aka' xquicol-qui' chi man xecamises ta tza'n espada, ch'aka' xyo'ox cuchuk'a' tok xec'uje' pa c'ayef, ch'aka' cof xepa'e' pa tak guerras, y xecokotaj-e soldados ri etakon chiquij coma ch'aka' chic tinamit. <sup>35</sup>Ec'o ixoki' roma cukul quic'u'x, xec'asos-pe ri (calpachel, caj-c'uaxel) ecaminak,<sup>m</sup> y xejach chic chique. Ch'aka' chic, roma cukul quic'u'x, xecamises chi k'axomal, y masque xsuj chique chi yecol chuveh ri camic, man xcajo' ta xquicol-qui', roma queteman chi nequila' jun c'aslen más utz. <sup>36</sup>Ec'o chic ch'aka' xeyo'ox chi q'uix y xech'ay,<sup>n</sup> y pa ruvi' ri' ec'o xeximilo'x che cadena, y xetz'apis pa tak cárcel. <sup>37</sup>Ch'aka' xec'akalo'x che abaj,<sup>o</sup> ch'aka' xek'at che sierra, ec'o xeyo'ox pa k'axomal richin ta xquiya' can ri Dios, ec'o xecamises chutza'n espada, ec'o ri xa quitz'umal ovejas y quitz'umal cabras ocunak quitziak,<sup>p</sup> y xexule-xejote' pa jalajoj tak lugares, man jun oc quichajin, bis quichi-quivech, y xeyalo'x pa tak k'axomal. <sup>38</sup>Xec'uje' pa chakijlaj tak tz'iran ulef,<sup>q</sup> pa tak juyu', pa tak sivan,<sup>r</sup> y pa tak jul.<sup>s</sup> Y ri vinak ri xa xbe cánima riq'u'in ri roch'ulef, man juba' utz ri quic'aslen richin ta xec'uje' ri cukul quic'u'x chiquicojol.

<sup>39</sup>Conojel ri cukul quic'u'x<sup>t</sup> re', xbix chi xquicot ránima ri Dios quiq'u'in, pero man xquic'ul yan ta e ri rusujun chique. <sup>40</sup>Can c'a xcoyo'ej na chi niquic'ul, roma ri Dios runojin-pe chi c'a pa ka-tiempo roj nu'on jun c'ac'ac' ruchojmil más utz. Quiri' xu'on richin quiri' junan quiq'u'in rije' xtiyo'ox chike ri favor ri más tz'akat.

### Xe riq'u'in ri Jesús tikaya-vi-apu kavech

**12** <sup>1</sup>Roma c'a ri', riq'u'in chi quiyo'on-pe quivech chikij jani na eq'uiy ri xcuke-e quic'u'x riq'u'in ri Dios, ja jun roj tikaya' can ronojel ri c'o ralal chikij y ri mac ri nkururari'lj,<sup>u</sup> y xe jun tikabana' che ri kánima richin nekaq'uisa' ri bey ri c'a c'o na chikavech.<sup>v</sup> <sup>2</sup>Xaxe riq'u'in ri Jesús

<sup>f</sup> 11:31 Stg. 2:25. <sup>g</sup> 11:32 Jue. 6:11. <sup>h</sup> 11:32 Jue. 4:6. <sup>i</sup> 11:32 Jue. 13:24.

<sup>j</sup> 11:32 Jue. 11:1. <sup>k</sup> 11:32 1 S. 16:1, 13. <sup>l</sup> 11:32 1 S. 1:20.

<sup>m</sup> 11:35 1 R. 17:22. <sup>n</sup> 11:36 Jer. 20:2. <sup>o</sup> 11:37 1 R. 21:13; 2 Cr. 24:21. <sup>p</sup> 11:37 2 R. 1:8.

<sup>q</sup> 11:38 1 S. 23:15, 19; 24:1. <sup>r</sup> 11:38 1 S. 22:1; 1 R. 18:4. <sup>s</sup> 11:38 1 R. 19:9.

<sup>t</sup> 11:39 He. 11:2, 13. <sup>u</sup> 12:1 Ef. 4:22. <sup>v</sup> 12:1 1 Co. 9:24.

tikaya-vi-apu kavech,<sup>w</sup> roma ja rija' xjako bey y ja rija' xtetz'akatisan chi cukul kac'u'x riq'u'in ri Dios. Rija' riq'u'in reteman chi más na jabel xtequicot tok k'axnak chic chupan ri nimalaj k'axomal chuvech cruz,<sup>x</sup> romari' man xupokonaj ta xuk'asaj jun camic niq'uixbisan, y c'ajari' xtz'u'ye-apu<sup>y</sup> pa rutz'uyubal pa ru-derecha ri nimalaj rutz'uyubal ri Dios.

<sup>3</sup>Roma c'a ri', tiya' na pe pa cuenta utz-utz ri Jesús ri xucoch' jani na chi k'axomal<sup>z</sup> pa quik'a' ri aj-mac tak vinak, richin quiri' man tiyamayo-ka ri ivánima ni man quixcos<sup>a</sup> chupan ri bey ri c'a c'o na chivech. <sup>4</sup>Kitzij na vi chi rix itijon ik'ij chirij ruchuk'a' ri mac, pero man ik'asan ta jun k'axomal ri can ta rix ruc'uan pa camic riq'u'in ri itijon ik'ij. <sup>5</sup>Xa imestan ri nu'ij ri Dios ri achel jun tata'aj ri quire' nu'ij richin yixrupaxa'aj riq'u'in ri ruch'abel:

Rat valc'ua'l, man itzel tana' tok yin ri Avajaf ninchojmirisaj<sup>b</sup> ri ac'aslen,

Ni man tiyamayo-ka ri avánima tok nin-ij chave ri man utz ta ri yatajin riq'u'in.

<sup>6</sup>Roma ri yerojo' ri Ajaf, nuchojmirisaj quic'aslen,<sup>c</sup>

Y conojel ri nuc'ul quivech richin ye'oc ralc'ua'l, yeruchojmirisaj riq'u'in xic'a'y.

Quiri' nu'ij ri tz'iban can.

<sup>7</sup>Romari', ticoch'o' c'a tok yixchojmirises, roma ri Dios ja najin iviq'u'in achel nu'on jun tata'aj<sup>d</sup> quiq'u'in ri ralc'ua'l. Y nis-ta jun ac'ual ri man ta nichojmirises ruc'aslen roma ri rutata'.<sup>e</sup> <sup>8</sup>Roma si ri Dios man nuchojmirisaj ta ri ic'aslen<sup>f</sup> achel nu'on quiq'u'in conojel ri ralc'ua'l, nek'alajin-pe chi mana-ta rix ralc'ua'l, xa rix achel ac'ola' ri man k'alaj ta (achique, acu'x) quitata'. <sup>9</sup>Tuka pan ivi' tok xojq'uiy-pe, ri kate-katata' xquichojojmirisaj-pe ri kac'aslen, y utz xekatz'et. Y romari', más nic'atzin nikaya-ki' chuxe' rutzij ri Katata' Dios, ri niyo'on ruc'aslen ri kánima,<sup>g</sup> y xtic'uje' kiq'u'in ri c'aslen ri richin jumul. <sup>10</sup>Kitzij na vi chi ri aj-roch'ulef tak kate-katata' chupan ri juba' tiempo xojc'uje' quiq'u'in, xquichojojmirisaj-pe ri kac'aslen achel xcajo' xqui'en. Jac'a ri Katata' Dios can richin chi c'o utz nuq'u'en-pe chike tok nkuruchojmirisaj, richin quiri' nkujoc achel rija' ri can lok'olaj<sup>h</sup> vi. <sup>11</sup>Can kitzij na vi chi tok jun vinak nichojmirises ruc'aslen<sup>i</sup> man nu'on yan ta che ri ránima chi niquicot. Pa ruq'uexel ri', xa bis nuya' che. Pero ri c'o niquetmaj can chupan, tok nik'ax ri tiempo, nuq'u'en-pe uxlanan pa cánima, y nu'on chi más choj' niqui'en che ri quic'aslen.

<sup>w</sup> 12:2 Zac. 12:10; 2 Co. 3:18. <sup>x</sup> 12:2 Fil. 2:8; 1 P. 1:11. <sup>y</sup> 12:2 Sal. 110:1; Lc. 24:26; He. 1:3; 8:1. <sup>z</sup> 12:3 Jn. 15:20. <sup>a</sup> 12:3 Gá. 6:9. <sup>b</sup> 12:5 Job 5:17. <sup>c</sup> 12:6 Sal. 94:12; Stg. 1:12. <sup>d</sup> 12:7 Dt. 8:5. <sup>e</sup> 12:7 2 S. 7:14. <sup>f</sup> 12:8 1 P. 5:9. <sup>g</sup> 12:9 Nm. 16:22; 27:16. <sup>h</sup> 12:10 Lv. 19:2; 1 P. 1:16. <sup>i</sup> 12:11 1 P. 1:6. <sup>j</sup> 12:11 Is. 32:17.

### Ri niquiya' can quij chuvech ri ru-favor ri Dios

<sup>12</sup>Roma c'a ri', man caca' ic'u'x ti'en-ka, xa tiya' ruchuk'a' ri ik'a' ecosnak, y quiri' mismo tibana' che ri ivakan roma xa achel ecaminak.<sup>k</sup> <sup>13</sup>Tichojmirisaj rubey ri ivakan chupan ri ic'aslen' riq'uin ri Dios, richin quiri', ri yejetz'ma'y yebin, man quejalc'atitaj can chupan ri quic'aslen riq'uin ri Dios, xa niquichojmij ri cakan chupan ri rubey. <sup>14</sup>Titija' ik'ij chi nic'uje' uxlanen chi'icojol quiq'uin conojel<sup>m</sup> y chi ch'ajch'oj ic'aslen, roma nis-ta jun xtitiquer xtutz'et ruvech ri Ajaf<sup>n</sup> si man ta ch'ajch'oj ruc'aslen. <sup>15</sup>Tito-ivi' chivech, man xa tibanataj chi c'o jun man nuc'ul ta ri favor ri rusujun can ri Dios. Man ta nibanataj chi niq'uiy-pe jun c'ayilaj no'oj<sup>o</sup> chi'icojol ri nik'ato chuvech ri uxlanen chi'icojol, y xa rix q'uiy yixretzelaj. <sup>16</sup>Man ta c'o jun chi'icojol ri nucusaj ri ru-cuerpo richin nic'uje' xa achok riq'uin na, ni man ta c'o jun ri xa man jun rakale'n nu'on che ri can lok'olaj vi chuvech ri Dios, achel xu'on ri Esaú ojer can, tok xa pa ruq'uexel jun va'in<sup>p</sup> xuc'ayij ri can richin vi nak rija' roma (nimala'tz, nimalaxel). <sup>17</sup>Roma rix iveteman chi tok xk'ax ri tiempo, ri Esaú xrojo' chi can ta xbix can pa ruvi' chi ja rija' ri nic'ulu can ri rusujun ri Dios che ri rutata', pero man xc'ul ta ruvech ri rutzij, roma manak chic che'el xtzolis tzij, masque ri Esaú riq'uin ok'ej<sup>q</sup> xucanoj chi xyo'ox che ri rusujun ri Dios.

<sup>18</sup>Quiri' nin-ij chive, roma rix más c'o ruk'ij ri lugar ri rix jelenak-vi-apu que chuvech ri xec'uje-vi-apu ri israelitas ojer. Roma rije' xec'uje-apu chuvech ri juyu' Sinaí ri xa c'o che'el nijel-apu quik'a' chirij, ri nijino pa k'ak', ri k'eku'n ruvi', ri jani na roch' chi k'eku'n rubanon, y (nijumin, nirumin) cak'ik' pa ruvi'.<sup>r</sup> <sup>19</sup>Chiri' xac'axex chi nik'ajan-pe trompeta y chi nich'o-pe jun kulaj ri xbano chique ri xe'ac'axan chi riq'uin quemelal xquic'utuj chi man chic tich'o-pe más chique.<sup>s</sup> <sup>20</sup>Quiri' xquic'utuj roma man niquicoch' ta ri xtak-pe rubixic chique ri quire' nu'ij: Si c'o jun xtuya-apu ruk'a-rakan chirij ri juyu', chi vinak chi chicop, nicamises<sup>t</sup> che abaj o che (ch'ab, ch'a'). Quiri' ri xquic'axaj. <sup>21</sup>Y jani na jun (ximbiril', ximbiril'y) nuya' ri xtz'etetaj chiri', romari' ri Moisés quire' xu'ij: Nuxi'in-vi<sup>u</sup> y yibarbot, xcha'. <sup>22</sup>Jac'a rix riq'uin ri jun chic juyu' rubinan Sion<sup>v</sup> ri richin ri c'aslic Dios rix jelenak-vi-apu, ri tinamit Jerusalem,<sup>w</sup> ri richin chicaj. Rix jelenak-apu quiq'uin chi miles ángeles, <sup>23</sup>ri quimolon-vi-qui' ri na'ey tak ralc'ua'l ri Dios ri tz'iban quibi' chicaj.<sup>x</sup> Rix jelenak-apu riq'uin ri Dios ri xtinic'on ronojel ch'utik-nima'k, y rix jelenak-apu riq'uin

<sup>k</sup> 12:12 Is. 35:3. <sup>l</sup> 12:13 Pr. 4:26. <sup>m</sup> 12:14 Ro. 14:19. <sup>n</sup> 12:14 Mt. 5:8; 1 Jn. 3:2.

<sup>o</sup> 12:15 Dt. 29:18. <sup>p</sup> 12:16 Gn. 25:32-34. <sup>q</sup> 12:17 Gn. 27:34. <sup>r</sup> 12:18 Ex. 19:16;

20:18; Dt. 4:11; 5:22-23. <sup>s</sup> 12:19 Ex. 20:19; Dt. 5:25; 18:16. <sup>t</sup> 12:20 Ex. 19:12.

<sup>u</sup> 12:21 Dt. 9:19. <sup>v</sup> 12:22 Ap. 14:1. <sup>w</sup> 12:22 He. 11:10; Ap. 21:2. <sup>x</sup> 12:23 Lc. 10:20.



cánima ri xquic'uj jun chojmilaj<sup>y</sup> c'aslen ri tz'akat chic banon chique roma ri Dios. <sup>24</sup>Rix jelenak-apu riq'uin ri Jesús ri pa'el chuech ri c'ac'ac' ruvujil c'aslen, y chuech ri ruquiq'uel<sup>z</sup> ri xquirex chirij ri ivánima richin ch'ajch'oj ni'an che. Ri quic' ri' más c'o rakale'n que chuech ri ruquiq'uel ri Abel.<sup>a</sup>

<sup>25</sup>Roma c'a ri', rix tibana' cuenta ivi', man tiya' can ivij chuech ri nich'o-pe chive. Roma, si ri israelitas ojer man xquicol ta qui' chuech ri castigo<sup>b</sup> ri xpe roma xquiya' can quij chuech ri nipaxa'an quichin vave' choch'ulef, más na quiri' roj vacami, man xtikacol ta ki' chuech ri castigo ri xtuya' ri nipaxa'an-pe kichin chicaj, si nikaya' can kij chuech. <sup>26</sup>Tok xac'axex ruch'abel ri Jun ri xch'o-pe pa ruvi' ri juyu' Sinaí, ronojel ri roch'ulef xsilon.<sup>c</sup> Jac'a ri vacami quire' ru'in ri Dios: Can c'a xtinsiloy na jun bey, pero man xe ta chic ri roch'ulef, xa quiri' mismo ri caj,<sup>d</sup> xcha'. <sup>27</sup>Y tok xu'ij: Can c'a xtinsiloy na, xcha', re' nu'ij tzij chi ronojel ri xa c'o che'el nisilos xque'elese-e<sup>e</sup> roma xa ebanon, richin quiri' xe chic ri manak che'el yesilos xquec'uje'. <sup>28</sup>Y roma roj banon chike chi c'o kak'a' chi junan nika'an gobernar riq'uin ri Dios, y ri' manak che'el nisilos,<sup>f</sup> romari' kumatioxin, y roma ri matioxinic ri' tikabana' ri nika chuech<sup>g</sup> ri Dios pa rusamaj, tikaya' ruk'ij y tikaxi'ij-ki' chuech. <sup>29</sup>Roma ri ka-Dios achel jun k'ak' ri nuporoj<sup>h</sup> ronojel.

### Ri utz chi niqui'en ri quiniman ri Jesucristo

**13** <sup>1</sup>Achel ri ibanon-pe chi ijo'on-pe-ivi'<sup>i</sup> chivech, jumul c'a quiri' tibana' rix ri junan iniman ri Jesucristo. <sup>2</sup>Man timestaj chi nic'atzin chi utz nic'ul quivech chi'ivacho ri epetenak naj,<sup>j</sup> roma ec'o jujun riq'uin xquic'ul quivech ri epetenak naj, nis-ta xquina'ej chi ángeles<sup>k</sup> ri xcoxkonej-e-qui' chicacho. <sup>3</sup>Man que'imestaj ri ec'o pa tak cárcel,<sup>l</sup> xa tina' chi achel ja jun rix, rix tz'apel, y man que'imestaj ri ni'an pokon chique, xa tina' chi achel ja jun rix rixc'o chupan ri pokon<sup>m</sup> junan quiq'uin. <sup>4</sup>Chi'ivonojel tina' chi can c'o rakale'n ri quic'aslen ri achi riq'uin ri rixayil, y chi eca'i', xe chiquivech tiquic'uj-vi-qui'. Roma ja ri Dios mismo xtiyo'on castigo pa ruvi' ri man xe ta chic ri achok riq'uin c'ulan-vi nu'c'uj-vi-ri' y pa ruvi' ri nucusaj ri ru-cuerpo richin nic'uje' xa achok riq'uin na.<sup>n</sup> <sup>5</sup>Man ti'le ivánima pa ruvi' méra,<sup>o</sup> xa tiquicot ivánima riq'uin ri ajani ichajin vacami. Roma ri Dios quire' ru'in: Yin man jun

<sup>y</sup> 12:23 Ap. 6:9. <sup>z</sup> 12:24 1 P. 1:2. <sup>a</sup> 12:24 He. 7:19; 8:6; 11:4. <sup>b</sup> 12:25 Nm. 16:1-50.

<sup>c</sup> 12:26 Ex. 19:18. <sup>d</sup> 12:26 Hag. 2:6. <sup>e</sup> 12:27 Sal. 102:25-26; Is. 34:4; 65:17;

Mt. 24:35. <sup>f</sup> 12:28 Dn. 2:44. <sup>g</sup> 12:28 He. 13:15, 21. <sup>h</sup> 12:29 Dt. 4:24; 9:3; Sal. 21:9.

<sup>i</sup> 13:1 Ro. 12:10; 1 Ts. 4:9; 1 P. 1:22; 1 Jn. 3:11, 18. <sup>j</sup> 13:2 Ro. 12:13; 1 P. 4:9.

<sup>k</sup> 13:2 Gn. 18:1-8; 19:1-2. <sup>l</sup> 13:3 Col. 4:18; He. 10:34. <sup>m</sup> 13:3 Ro. 12:15.

<sup>n</sup> 13:4 1 Co. 6:9; 1 Ts. 4:3-6. <sup>o</sup> 13:5 Ef. 5:3; Col. 3:5.

bey xquixinxutuj can,<sup>p</sup> ni man jun bey xtinya' can<sup>q</sup> vij chivech, xcha'. <sup>6</sup>Y roma quiri' ru'in chike, cukul kac'u'x nkutiquer nika'ij:

Yin ja ri Ajaf nito'on vichin;

Man ninxi'ij ta vi' chuvehch ri achique nicajo' niqiu'en ri vinak'<sup>r</sup>  
chuve,

nkucha'.

<sup>7</sup>Man que'imestaj ri xeyuk'un ivichin pa ruvi' ruch'abel ri Dios. Tinojij rij ri rajil-ruq'uexel quic'ulun rije' riq'uin ri c'aslen ri xquic'uaj, y achel xqui'en rije' chi xcuke-e quic'u'x, quiri' mismo tibana' rix.<sup>s</sup> <sup>8</sup>Quiri' nin-ij chive roma ri Jesucristo ja achel ri ivir, quiri' ri vacami, y quiri' mismo ri chikavech apu.<sup>t</sup> <sup>9</sup>Ri jalajoj tak (tjionic, enseñanza) ri man ruc'uan ta ri' riq'uin ri nu'ij ruch'abel ri Dios, man tiya' lugar chi yixruc'uaj juc'an chic.<sup>u</sup> Roma más utz chi ri ivánima nuc'ul ruchuk'a' riq'uin ru-favor ri Dios,<sup>v</sup> y mani riq'uin ninimaj chi c'o cosas utz y c'o ri man utz ta richin yetij,<sup>w</sup> roma ri benak cánima pa ruvi' ri xaxe richin yetij, man jun bey c'o utz xuq'uen-pe chique.<sup>x</sup> <sup>10</sup>Roj ri kaniman ri Jesucristo, mana-ta chic quiquiq'uel chicop yesuj roma kamac chuvehch ri Dios, ja yan chic ruquiq'uel ri Jesucristo ri xbin ri nitojo. Y ri sacerdotes israelitas ri yequisuj quiquiq'uel chicop roma ri mac chupan ri aj-roch'ulef racho ri Dios, manak quik'a' richin c'o favor niqiu'uen can che ri sipanic ri sujun roma ri kamac.<sup>y</sup> <sup>11</sup>Ri achique roma nin-ij quiri', jare': Ri chicop ri nuc'uax-apu quiquiq'uel chutojic ri mac chupan ri Lugar Más Lok'olaj pa racho ri Dios roma ri nimalaj sacerdote israelita, ri quich'acul ri chicop ri' ye'eleses-e pa tinamit richin yeporox.<sup>z</sup> <sup>12</sup>Romari' ri Jesús richin xu'on ch'ajch'oj che ri rutinamit<sup>a</sup> riq'uin ri ruquiq'uel,<sup>b</sup> ja jun rija' xeleses-e pa tinamit<sup>c</sup> y chiri' xcamises-vi. <sup>13</sup>Vacami, kujel c'a e roj pa tinamit, jo' riq'uin ri Jesús, xa jun tikabana' riq'uin chupan ri yok'oníc ri achel x-an-e che<sup>d</sup> rija'. <sup>14</sup>Roma vave' choch'ulef manak jun katinamit ri can ta kichin jumul,<sup>e</sup> pero c'o jun aj-chicaj katinamit<sup>f</sup> ri man jani tekila', y jari' ri benak kánima chucanoxic vacami. <sup>15</sup>Roma c'a ri', riq'uin ruto'ic ri Jesucristo, jumul tikaya' ruk'ij<sup>g</sup> ri Dios, achel can ta jun sipanic ri nikasuj-apu chuvehch, riq'uin ri nika'ij chiquivech ch'aka' chic chi kaniman rubi'. <sup>16</sup>Man tikaya' can rubanic ri utz, y nis-ta chi nikatola-ki' chikavech,<sup>h</sup> roma ri quiri' nika'an, jun sipanic ri ntel ránima<sup>i</sup> ri Dios chi nikasuj chuvehch.

<sup>p</sup> 13:5 Gn. 28:15. <sup>q</sup> 13:5 Dt. 31:6. <sup>r</sup> 13:6 Sal. 27:1; 118:6. <sup>s</sup> 13:7 He. 6:12.

<sup>t</sup> 13:8 He. 1:12; Ap. 1:4. <sup>u</sup> 13:9 Ef. 4:14. <sup>v</sup> 13:9 Col. 2:7. <sup>w</sup> 13:9 Col. 2:16.

<sup>x</sup> 13:9 He. 9:10. <sup>y</sup> 13:10 1 Co. 9:13; 10:18. <sup>z</sup> 13:11 Ex. 29:14; Lv. 4:11-12, 21; 9:11; 16:27. <sup>a</sup> 13:12 Ef. 2:11. <sup>b</sup> 13:12 He. 9:12. <sup>c</sup> 13:12 Jn. 19:17. <sup>d</sup> 13:13 He. 11:26.

<sup>e</sup> 13:14 Mi. 2:10. <sup>f</sup> 13:14 Fil. 3:20. <sup>g</sup> 13:15 Sal. 50:14; Ef. 5:19. <sup>h</sup> 13:16 Ro. 12:13.

<sup>i</sup> 13:16 Fil. 4:18.

<sup>17</sup>Tinimaj quitzij ri yeyuk'un ivichin pa ruvi' ruch'abel ri Dios,<sup>j</sup> tiya-ivi' chuxe' quitzij, roma ja rije' yevaran pa ruvi' ri ivánima,<sup>k</sup> roma queteman chi c'o na jun k'ij nequijacha' cuenta chuveh ri Dios. Tinimaj c'a quitzij, richin quiri' yequicot yixquivaraj y mani riq'uin bis. Roma si riq'uin bis, man jun utz nuq'uen-pe chive.

<sup>18</sup>Tibana' orar pa kavi'.<sup>l</sup> Quiri' nika'ij chive roma ri kánima nuna' chi utz nkubin chuveh ri Dios, y nikarayij chi ronojel ri nika'an, can ta utz chuveh. <sup>19</sup>Y más ninc'utuj quemelal chive chi tibana' orar pa nuvi' yin, richin quiri' yitiquer chic yixentz'eta'<sup>m</sup> cha'anin.

### Ri ruq'uisbel tak saludos y ri ruq'uisbel tak ch'abel che ri vuj re'

<sup>20</sup>Ri Dios ri niyo'on uxlanen<sup>n</sup> pa tak kánima, jari' xc'ason-e chiquicojol ri anima'i' ri Nimalaj Yuk'unel<sup>o</sup> quichin ri ovejas, y ri' ja ri Kajaf Jesucristo ri xbin ruquiq'uel<sup>p</sup> richin xc'achoj ri c'ac'ac' ruvujil c'aslen ri man jun bey xtijalataj-e. <sup>21</sup>Ja ta c'a Dios ri' ri xquixto'on richin yixtiquer ni'en utzulaj tak favores, richin ni'en ri nrojo' rija'. Can ta xtusamajij pan ic'aslen ri achique nika chuveh, y ri' roma ri Jesucristo ri jumul-jumul tiyo'ox nimalaj ruk'ij. Amén.

<sup>22</sup>Ninc'utuj c'a quemelal chive rix ri junan kaniman ri Jesucristo iviq'uin, chi ticoch'o' juba' re ch'abel yencusaj richin yixinpaxa'aj, roma xa man q'uiy ta ri achique nutz'iban-e chive. <sup>23</sup>Ninya' rutzijol chive chi ri Timoteo<sup>q</sup> ri junan kaniman ri Jesucristo riq'uin, xa xeleses yan pe pa cárcel; y si xtuka cha'anin viq'uin, junan xquixentz'eta' riq'uin. <sup>24</sup>Que'ibana' saludar conojel ri yeyuk'un ivichin pa ruvi' ruch'abel ri Dios,<sup>r</sup> y conojel ri ch'ajch'oj chic banon che quic'aslen roma ri Dios. Ri aj pa roch'ulef Italia ri ec'o vave' niquitak-e i-saludo. <sup>25</sup>Ri ru-favor ri Dios xtic'uje' ta c'a iviq'uin chi'ivonojel. Amén.

<sup>j</sup> 13:17 Ez. 3:17; 33:2, 7.    <sup>k</sup> 13:17 Hch. 20:28.    <sup>l</sup> 13:18 1 Ts. 5:25; 2 Ts. 3:1.

<sup>m</sup> 13:19 Fil. 1:25; 2:24.    <sup>n</sup> 13:20 Ro. 15:33.    <sup>o</sup> 13:20 Is. 40:11; Ez. 34:23; 37:24; Jn. 10:11.

<sup>p</sup> 13:20 Mt. 26:28; Lc. 22:20.    <sup>q</sup> 13:23 Hch. 16:1-3; 1 Ts. 3:2; Flm. 1.    <sup>r</sup> 13:24 He. 13:7.